

四庫全書

史部

欽定四庫全書

史部

欽定續文獻通考卷八十八

給事中^臣陳化龍覆勘

總校官內閣中書^臣孫溶

欽定四庫全書

欽定續文獻通考卷八十八

王禮考

朝儀

明太祖洪武元年正月即皇帝位於南郊還御殿受朝
賀

先是吳元年十二月命左丞相李善長具登極儀善
長率禮官奏即位日先告祀天地禮成即位於南郊

丞相率百官以下及都民耆老拜賀舞蹈呼萬歲者
三具鹵簿導從詣太廟上追尊四世冊寶告祀社稷
還具袞冕御奉天殿百官上表賀遂定為登極儀

臣等謹按洪武實錄二年正月帝以羣臣每遇朝
賀呼萬歲者三雖云臣子祝上實亦虛詞諭宰臣
更之八月禮部尚書崔亮等言舊制朝賀之禮贊
禮者既唱三舞蹈訖復三唱山呼羣臣拱手加額
與樂工軍校齊稱萬歲者三喧嘩不齊誠為失儀

近改擬山呼為贊呼百官應之曰天輔有德曰海
宇咸寧曰聖躬萬福甚為嚴肅從之今以禮志考
之大朝儀仍用山呼似後此未為定制也

十三年九月天壽節始受羣臣朝賀賜宴於謹身殿後
以為常十五年正月宴羣臣於謹身殿始用九奏樂
臣等謹按實錄先是五年八月庚辰罷天下進賀
聖節冬至表箋帝曰正旦為歲之首天運維新人
君法天出治臣下進表稱賀禮亦宜之生辰冬至

於文繁矣昔唐太宗謂生辰是父母劬勞之日況
朕皇考皇妣早逝每於是日不勝悲悼忍受天下
賀乎自是每聖節日齋居素食不受朝賀至是年
七月韓國公李善長等累疏上請然後許之顧炎
武日知錄謂自是雖歲以為常而不受獻不賦詩
不賜醑不齋醮則帝所云勉從中制者也若宴羣
臣禮詳見大宴儀

二十四年四月定常朝侍班官及百官入朝次第

東則六部都察院堂上官十三道掌印御史通政司
大理寺太常寺太僕寺應天府翰林院春坊光祿寺
欽天監尚寶司太醫院五軍斷事及京縣官西則五
軍都督錦衣衛指揮各衛掌印指揮給事中中書舍
人為侍班官又令禮部置百官朝牌大書品級列丹
墀左右木柵上依序立并凡入殿必履鞮再入朝次
第令朝參將軍先入近侍次之公侯駙馬伯又次之
五府六部又次之應天府及在京雜職官員又次之

惠帝建文元年正月朔帝謁奉先殿朝皇太后詣孝陵
上香還御殿受朝不舉樂

二年正月朔詔天下來朝官勿賀

成祖永樂元年正月朔御奉天殿受朝賀宴羣臣及屬
國使 四年正月初御午朝

初令內閣官侍朝立金臺東錦衣衛在西後移御道
東西對立至是諭近侍及六部官曰早朝多四方所
奏事午後事簡君臣之間得從容陳論自今有事當

商確者皆於晚朝

臣等謹按春明夢餘錄常朝御門其寶座謂之金臺陸容芟園雜記翰林院尚寶司六科官凡常朝俱在奉天門御座左右侍立故云近侍自太宗晚年有疾令女官扶持上下乃退居門下御道左右遂為定位矣

七年七月以北巡至北京御奉天殿受朝賀十月令羣臣於右順門內便殿奉事

時以天寒謂行在禮部曰北京冬氣嚴凝羣臣早朝
奏事立久不勝今後朝畢可奏事於右順門內便殿
十一年正月朔以日食詔罷朝賀宴會 十二年八月

朔至北京御奉天殿受朝賀

以親征瓦剌大捷班師故也

十九年正

月朔

時已遷都北京

御奉天殿受朝賀大宴四月萬壽節以

三殿灾止賀

二十年正月朔以日食免朝賀 二十

二年十一月

時仁宗已即位

己丑禮官奏冬至節請受賀不許

禮志仁宗登極先期司設監陳御座於奉天門欽

天監設定時鼓尚寶司設寶案教坊司設中和韶

樂

設而不作

是日早遣官告天地宗社皇帝具素服告

几筵至時鳴鐘鼓設鹵簿皇帝袞冕御奉天門百
官朝服入午門鴻臚寺導執事官行禮請升御座
皇帝由中門出升座鳴鞭百官上表行禮頒詔俱
如儀

仁宗洪熙元年正月朔御奉天門受朝不舉樂

時禮部尚書胡震固請受賀作樂如大朝儀不許

宣宗宣德七年正月朔以日食免朝賀 十年正月癸

酉朔不視朝命羣臣謁皇太子於文華殿壬午

時英宗
已即位

始罷午朝

時閣臣楊士奇楊溥楊榮以帝幼冲初即位罷午朝
又創制每日早朝止許言事八件前一日先以副本
詣闕下豫以各事處分陳上過奏止依所陳傳旨而
已後遂為定制

景帝景泰元年正月朔罷朝賀

先是正統十四年七月詔親征瓦剌命皇弟郕王居守八月皇太后命王監國九月郕王即位遙尊皇帝為太上皇至是帝詣奉先殿朝上聖皇太后及皇太后出御奉天殿百官行五拜三叩頭禮以上皇在北免賀八月丙戌上皇自瓦剌還京師帝迎於東安門入居南內帝帥百官朝謁十一月禮部尚書胡濙請令百官賀上皇萬壽節十二月復請明年正旦百官朝上皇於延安門皆不許

臣等謹按朱國禎大政記明以五拜三叩頭為臣下見君上之禮先拜手稽首四拜復一拜叩頭成禮此是年云罷朝賀以不用大朝禮也

二年八月復午朝

先是元年正月兵部郎中王偉請御午朝是年二月侍講學士周叙又請午朝日接大臣諮誨治道至是給事中葉盛復以為請帝立報可

明史禮志曰景泰初定午朝儀凡午朝御左順門

設寶案奏事官候於左掖門外駕出以次入內閣
五府六部奏事官六科侍班官案西序立侍班御史
二序班二將軍四案南面北立鳴贊一案東西向立
錦衣衛鴻臚寺東向立管將軍官侍衛官立於將
軍西府部奏事畢撤案各官退有密事赴御前奏

憲宗成化七年十二月避正殿御奉天門聽政

以彗星
入紫微

垣故
也

二十一年六月詔盛暑祁寒廷臣所奏毋得過五

事

臣等謹按實錄成化十四年九月鴻臚寺序班陳琮奏每旦視朝侍衛官軍與常叅職官爭門而進殊為無序宜自今著例鼓再嚴令官軍先入序立鼓三嚴常叅官乃如品級序入從之二十三年七月鴻臚寺寺丞孫繩宣讀有誤為糾察御史所劾先是諭監察御史等官今後通政鴻臚宣讀奏辭有差錯一二字者免劾乃復申前詔旨附錄於此

孝宗弘治十年正月召大學士劉健李東陽謝遷於文

華殿議庶政後以為常

臣等謹按劉若愚燕史建極殿居中向後高踞三
纏白玉石欄杆之上者雲臺門也兩旁向後者東
曰後左門西曰後右門即雲臺左右門亦名曰平
臺凡召對閣臣等官或於平臺即後左門也又劉
健傳是年四月大同告警兵部請甄別京營帝乃
召健及東陽遷至平臺面議去留焉

武宗正德十二年正月郊遂獵於南海子夜中還御奉

天殿受朝賀八月丙辰至自昌平戊午夜視朝

臣等謹按實錄九年正月戊寅慶成宴帝至暮始出御殿文武羣臣及天下朝覲官四夷朝貢使席前皆設燭前此所未有也十年正月戊辰郊漏下二鼓始還御殿行慶成禮十二年正月夜半御殿行禮之明日以所獵賜廷臣夜宴殿上不設燭帝御寶座久之未徹爵鴻臚傳贊與宴者就席如常儀而退十一月辛丑冬至帝在宣府羣臣朝服於

奉天門行遙賀禮十三年正旦帝在宣府冬至
在榆林十四年正旦在太原冬至南巡至清江浦

受朝賀於太
監張陽第

羣臣遙賀並如之十五年正月朔受

朝賀於南京十二月詔百官戎服朝明年正旦
南京兵部尚書喬宇禮部侍郎楊廉不可率羣臣
朝服賀以本紀不載附錄之

十六年三月慈聖皇太后命迎興獻王世子於興邸

即

也宗四月即皇帝位

興獻王世子於四月癸未發安陸癸卯至京師止於
郊外禮官具儀請如皇太子即位禮帝顧長史袁宗
臯曰遺詔以我嗣皇帝位非皇子也楊廷和等請如
禮臣所具儀由東安門入居文華殿擇日登極不允
會皇太后趣羣臣上箋勸進乃即郊外受箋是日日
中入自大明門謁武宗几筵朝皇太后出御奉天殿
即位

明史禮志世宗登極先期造行殿於宣武門外南

向設帷幄御座脩翼善冠服及鹵簿大駕以候至
期百官郊迎駕入行殿行四拜禮明日由大明門
入省詔草改年號素服詣武宗几筵謁告畢設香
案奉天殿丹陛上皇帝袞冕行告天地禮詣奉先
殿奉慈殿謁告仍詣武宗几筵慈壽皇太后莊肅
皇后前各行禮遂御華蓋殿百官朝服入傳旨免
賀五拜三稽首鴻臚寺官請升殿帝由午門出御
奉天殿鳴鞭贊拜頌詔如制

世宗嘉靖二十五年七月以醴泉出承華殿廷臣表賀
臣等謹按實錄世宗好言符瑞凡醴泉芝草等不
一而足此特以廷臣表賀故史舉一以見其餘耳
二十九年八月癸未始御奉天殿戒諭羣臣

臣等謹按實錄自嘉靖十二年十一月乙丑冬至
次日丙寅當行賀冬禮帝以疾始不御殿羣臣俱
於奉天門行五拜禮嗣後常朝以漸而廢至二十
五年正旦一受朝賀終帝之世三大節俱不復御

殿百官於奉天門外行五拜三叩頭禮朝覲官及
四夷使於午門外行禮歲以為常郭正域典禮志
謂明代朝會之禮參用漢唐宋之舊太祖時正至
壽節奉天殿受朝賀賜宴謹身殿及東西廡其番
使表賀則於至之日設朝每日見羣臣於謹身殿
或奉天殿奉天門為常期蓋正德以前列帝無日
不見羣臣也世宗中歲躬修元默罕見臣工惟二
三大臣入直無逸日在左右是年御殿亦非常典

也

又按大政記嘉靖三十六年四月三殿災詔移朝儀於端門四十一年九月三殿成改奉天為皇極殿門曰皇極門華蓋殿為中極謹身殿為建極文樓曰文昭閣武樓曰武成閣左順門曰會極右順門曰歸極東閣門曰弘政西角門曰宣治是後朝會具儀俱用新名云

穆宗隆慶元年六月以靈雨修省素服避殿御皇極門

視事 四年正月乙巳朔日食免朝賀 五年二月甲

午廷臣及朝覲官謁皇太子於文華左門

即神宗也

臣等謹按大政記載隆慶元年正月丁巳朔免朝

賀封奏如常儀戊午帝御宣治門視事今以實錄

考之時通政司言舊例自正旦至二十日以節假

免奏事封本茲值御門聽政勵精萬幾之始請封

奏如常從之

初十日丁卯賜百官上元節假十日諸司仍奏事

又禮部請

御宣治門聽政詔以正月二日始至三月乙卯始

御皇極門復常儀所云二日即戊午日是也以本
紀不載附錄之

神宗萬曆三年二月始命日講官分直記注起居纂緝
章奏臨朝侍班

常朝日記注起居官四人列於東班給事中上稍前
以便觀聽午朝則列於御座西稍南

十七年三月免升授官面謝

自是臨御遂簡

臣等謹按實錄時帝久不視朝三月丙辰遣中使傳諭奏對數多不耐勞劇大學士申時行等請謝恩見辭人員應候面者除升任出京已奉旨遵行其在京升授應面恩者如免朝三次具疏奏知因擬傳諭帖以進帝即命宣付鴻臚自此之後遂深居不出者二十年雖廷臣上疏奏請竟付之不報矣又按神宗紀二十年十一月御午門受寧夏俘二十七年四月御午門受倭俘二十八年十二月

御午門受播州俘皆非常典也

熹宗天啟元年二月言官請復當朝口奏及召對之典從之

愍帝崇禎元年八月詔非盛暑祁寒日御文華殿與輔臣議政

春明夢餘錄曰十五年七月中值常朝臨期傳免閣臣周延儒陳演蔣德璟黃景昉吳姓具揭進諫帝降手勅褒嘉閏十一月復詔二祖舊制每日常

朝見羣臣裁決政事今率循成憲除門朝照例應免日期傳免外餘每日視朝畢勲戚文武諸司等官有欲奏事者赴弘政門報名候召內外官員敢有壅蔽阻當者定以奸欺論斬

登極儀

先期侍儀司設表案於丹墀內道之西北設丞相以下拜位於內道東西每等異位重行北面捧表展表宣表官位於表案西東向糾儀御史二人於表案

南東西向宿衛鎮撫二人於東西陛下護衛百戶
二十四人於其南稍後知班二人於文武官拜位北
東西向通贊贊禮二人於知班北通贊西贊禮
東引文武班四人於文武官拜位北稍後東西向引
殿前班二人於引文武班南舉表案二人於引文
武班北舉殿上表案二人西陛下東向丹陛下設殿
前班指揮司官三人東向宣徽院官二人西向儀鸞
司官於殿中門之左右護衛千戶八人於殿東西門

俱東西向鳴鞭四人於殿前班之南北向將軍六人於殿門左右天武將軍四人於陛上四隅俱東西向殿上尚寶司設寶案於正中侍儀司設表案於寶案文武侍從兩班於殿上東西文起居注給事中殿中侍御史尚寶御武懸刀指揮東西向受表官於文侍從班南西向內贊二人於受表官之南捲簾將軍二人於簾前俱東西向是日拱衛司陳鹵簿列甲士於午門外列旗仗設五輅於奉天門外侍儀舍

人二舉表案入鼓初嚴百官朝服立午門外通贊贊禮宿衛官諸侍衛及尚寶卿侍從官入鼓三嚴丞相以下入皇帝袞冕升御座大樂鼓吹振作樂止將軍捲簾尚寶卿置寶於案拱衛司鳴鞭引班導百官入丹墀拜位初行作樂至位樂止知班贊班贊禮贊拜樂作四拜興樂止捧表以下官由殿西門入內贊贊進表捧表官跪捧受表官搯笏跪受置於案出笏興退立東向內贊贊宣表表官前搯笏跪展表官搯笏

同跪宣訖展表官出笏以表復於案俱退宣表官俯
伏興俱出殿西門復位贊禮贊拜樂作四拜樂止播
笏三舞蹈拱手加額呼萬歲者三出笏俯伏興樂作
四拜賀畢遂遣官冊拜皇后冊立皇太子以即位告
天下

臣等謹按禮志太祖登極儀如右成祖入立倉猝
其儀不詳宣宗以後儲宮嗣立並同仁宗至世宗
入承大統乃有更改已詳載於前

大朝儀

凡正旦冬至先日尚寶設御座於奉天殿及寶案於御座東香案於丹陛南教坊司設中和韶樂於殿內東西北向翌明錦衣衛陳鹵簿儀仗於丹陛及丹墀設明扇於殿內列車輅於丹墀鳴鞭四人左右北向教坊司陳大樂於丹陛東西北向儀禮司設同文玉帛兩案於丹陛東金吾衛設護衛官於殿內及丹陛陳甲士於丹墀至午門外錦衣衛設將軍於丹陛至

奉天門外陳旗幟於奉天門外俱東西列典牧所陳
仗馬犀象於文武樓南東西向司晨郎報時位於內
道東近北糾儀御史二位於丹墀北內贊二位於殿
內外贊二位於丹墀北傳制宣表等官位於殿內俱
東西向鼓初嚴百官朝服班午門外次嚴由左右掖
門入詣丹墀東西北向立三嚴執事官詣華蓋殿帝
具衮冕升座鐘聲止儀禮司奏執事官行禮贊五拜
畢奏請升殿駕興中和樂作尚寶司捧寶前行導駕

官前導扇開薰捲寶置於案樂止鳴鞭報時對贊唱
排班班齊贊禮唱鞠躬大樂作贊四拜興樂止典儀
唱進表樂作給事中二人詣同文案前導引序班舉
案由東門入置殿中樂止內贊唱宣表目宣表目官
跪宣訖俯伏興唱宣表展表官取表宣表官至簾前
外贊唱衆官皆跪宣表訖內外皆唱俯伏興序班舉
表案於殿東外贊唱衆官皆跪代致詞官跪丹陛中
致詞云具官臣某茲遇正旦三陽開泰萬物咸新冬

至則云律應黃鍾日當長至恭惟皇帝陛下膺乾納
佑奉天永昌賀畢外贊唱衆官皆俯伏興樂作四拜
興樂止傳制官跪奏傳制由東門出至丹陛東向立
稱有制贊禮唱跪宣制正旦則履端之慶與卿等同
之冬至則云履長之慶與卿等同之萬壽聖節則致
詞曰具官臣某欽遇皇帝陛下聖誕之辰謹率文武
官僚敬祝萬歲壽不傳制贊禮唱俯伏興樂止贊搢
笏鞠躬三舞蹈贊跪唱山呼百官拱手加額曰萬歲

唱山呼曰萬歲唱再山呼曰萬萬歲凡呼萬歲樂工
軍校齊聲應之贊出笏俯伏興樂作贊四拜興樂止
儀禮司奏禮畢中和樂作鳴鞭駕興尚寶官捧寶導
駕官前導至華蓋殿樂止百官以次出

太祖洪武元年九月定正

旦朝會儀與登極儀畧相仿其後屢詔更定立為中
制如右三十年更定同文玉帛案俱進安殿中宣表
訖舉置於寶案之南嘉靖十六年更定蕃國貢方物
案入於丹陛中道左右設定時鼓於文樓上大樂陳
奉天門內東西北向他儀亦畧有增損如立春日進
春都城府縣進春樂由東階升跪置於丹陛中道俯
伏興贊拜樂作四拜興樂止文武官北向立致詞官
詣中道之東跪奏云新春吉辰禮當慶賀贊拜樂作

五拜三叩頭興崇止儀禮司奏禮畢正統十一年正旦立春禮部議順天府官進春後百官即詣班行賀正旦禮舊制冬至日行賀禮嘉靖九年分祀二郊以冬至大報是日行慶成禮次日帝詣內殿行節祭禮又詣母后前行賀禮訖始御奉天殿受賀附錄于此

陸容茶園雜記曰本朝將軍之名不一職方司職掌收充將軍蓋選軍民中之長軀偉貌者以充朝儀耳今謂之大漢將軍優旃所稱桎梏郎疑卽此也凡大朝會若番使入貢天子御正殿大漢將軍著飾金介冑持金瓜鐵鉞刀劍列丹陛上常朝著

明鐵介胄列門楯間其次等者御道左右及文武
官班後相向握刀布列凡鑾輿出入扈從以行宿
衛巡警之事則以侯伯都督係國戚者統之其常
朝宿衛各以番上謂之正直有大事無番上謂之
貼直正直者金牌相傳懸挂貼直者尚寶司奏而
給發事畢復納之

常朝儀

朔望御奉天殿常朝官序立丹墀東西向謝恩見辭

官序立奉天門外北向升座作樂常朝官一拜三叩
頭樂止復班謝恩見辭官於奉天門外五拜三叩頭
畢駕興又凡早朝御文華殿文武官於鹿頂外東西
立鳴鞭以次行禮訖四品以上官入侍殿內五品以
下仍前北向立有事奏者出班奏畢鳴鞭以次出如
御奉天殿先於華蓋殿行禮奏事畢五品以下詣丹
墀北向立五品以上及翰林院給事中御史於中左
中右門候鳴鞭詣殿內序立朝退出凡百官於御前

侍坐有官奏事必起立奏畢復坐從皇帝行丹墀常北面不南向左右周旋不背北皇帝升奉天門及丹

陛隨從官不得徑由中道并王道

洪武三年定制朔望日帝皮弁服御

奉天殿百官朝服於丹墀東西再拜班首詣前同百官鞠躬稱聖躬萬福復位皆再拜分班對立省府臺部官有奏由西階升殿奏畢降階百官出十七年罷朔望起居儀從更定儀如右成化十四年令常朝日進士照辦事衙門次第立見任官後嘉靖九年令常朝官禮畢內閣官由東陛錦衣衛官由西階并立於寶座東西有欽差官及外國人領勅坊局官一人奉勅立內閣後稍上候領勅官辭奉勅官承旨由左陛下循御道授之隆慶六年詔以三六九日視朝

邱濬大學衍義補曰祖宗以來一日三朝自古帝王所未有也每日晨興即御奉天門文東武西侍鳴鞭畢鴻臚寺卿唱入班百官行叩頭禮分班侍立翰林學士侍御座左錦衣衛官陞西立六科給事中分侍左右御史分班北面立鴻臚官屬立其後先日謝恩見辭者於鴻臚寺報名至日先赴午門外候百官叩頭畢鴻臚御對御宣奏姓名員數於午門外行五拜三叩頭禮畢五府六部以次奏

所司合行事次通政司引入於御前面奏請旨該
司官出班承旨大理寺以下有事出奏無則已次
禮科引差使考滿官員次六科各奏旨意題本守
衛揭帖賞賜鈔錠次鴻臚宣奏藩府邊鎮所遣使
臣帝命以酒飯賞賜既而兩京堂上官新任者及
在外三司來朝赴任者面見叩頭畢鴻臚卿唱奏
事畢羣臣俱側身向上立鳴鞭畢帝乘輦御武英
殿或文華殿閱章疏日率如此至午復出朝晚亦

如之此每日常朝之制也

臣等謹按大政記載建文四年十二月成祖已即位令功臣年老者許免朝叅今以會典考之執政大臣年高者取自特旨免朝倘有顧問便殿賜坐則免朝不僅功臣矣又如實錄宣德四年三月優免太師英國公張輔彭城伯張景會昌伯孫忠都督張昇朝叅但朝朔望此功臣以年老免朝也成化元年命太子太保吏部尚書王翱止朝朔望弘

治二年四月免吏部尚書王恕午朝大風雨雪早
朝亦免十年五月命大學士徐溥風雨寒暑免朝
泰十七年十二月命吏部尚書馬文升大寒風雨
免朝泰此大臣以年老免朝也若宣德五年八月
詔鴻臚寺少傅楊士奇年老有疾趨朝或後不及
就班毋得論奏是雖未免朝而所以優禮老臣者
至矣

皇太子親王朝儀

凡正旦等大朝皇帝御奉天殿先設皇太子親王次於文樓設拜位并拜褥於丹陛上正中皇帝升座殿前執事班起居訖引進引皇太子及親王由奉天門東門入百官齊入樂作皇太子親王升自東階至丹陛拜位樂止贊四拜樂作興樂止引進導由東殿門入樂作引至御座前位樂止唱跪皇太子跪稱賀云長子某茲遇履端之節冬至則云履長率諸弟某等欽詣父皇陛下稱賀傳制如前贊俯伏興皇太子諸

王由東門出樂作引進引復丹陛位樂止贊四拜樂作興樂止降自東階樂作至文樓樂止百官隨入賀

其朝皇后則於坤寧宮畧如朝皇帝儀

洪武元年九月定制如右

二十六年改定朝賀於乾清宮其日皇帝皇后升座侍從導引如儀引禮引皇太子及妃親王及妃詣帝位前贊禮贊四拜興贊禮引皇太子詣前贊跪引禮贊皇太子妃諸王及妃皆跪皇太子致詞同前不傳制贊禮贊皇太子俯伏興引禮贊諸王俯伏興太子妃諸王妃皆興贊禮引皇太子復位贊拜皇太子以下皆四拜禮畢引禮引至皇后前其前後贊拜皆如朝皇帝儀致詞稱母后殿下禮畢出七年更定不致賀辭止行朝賀皇太后禮皆同八拜禮

諸王來朝儀

仿古封建親王之藩不常入朝朝則賜賚甚厚初凡來朝先期陳御座於奉天殿如常儀諸王次於奉天門外東耳房鼓三嚴百官入就侍立位引禮導王具袞冕由東門入升東陛就位王府從官就丹墀位贊拜樂作王與從官皆四拜興樂止王從殿東門入樂作內贊導至御前樂止王跪王府官皆跪王致辭曰第幾子某王某茲過某時入覲欽詣父皇陛下朝拜

贊俯伏興王由東門出樂作復拜位樂止贊拜四拜

王興從官皆四拜興樂作駕興王及各官以次出

洪武

二十六年定凡諸王大朝行八拜禮常朝一拜凡伯叔兄見天子在朝行君臣禮便殿行家人禮伯叔兄西向坐受天子四拜天子居中南而坐以尚親親之義存君臣之禮凡外戚朝見皇后父母見帝行君臣禮后見父母行家人禮皇太子見皇后父母皇后父母西向立皇太子東向行四拜禮皇后父母立受兩拜答兩拜附錄之

明會典曰天子與親王雖有長幼之分在朝廷必

講君臣之禮盖天子之位即祖宗之位祖宗所執

大圭於上鏤字題曰奉天法祖世世相傳凡親王
來朝雖長於天子者天子執相傳之圭以受禮蓋
見此圭如見祖考也凡諸王來朝先常服見天子
三叩頭不拜奉先殿祭畢不拘何殿樓閣門下天
子執圭王冕服行五拜三叩頭禮次見東宮行四
拜禮如尊長東宮答拜若遇大宴會於便殿筵宴
叙家人禮羣臣大宴會中王並不入席又洪武初
令親王每歲朝覲不得一時同至一王還國無虞

信報別王方聽來朝不拘歲月自長至幼以適先
至適者朝畢方及庶者亦分長幼而至周而復始
毋失其序其諸王居邊者無警則依期來朝有警
從便不拘朝期

傅維鱗明書曰天子伯叔五十不朝兄弟孫姪六
十不朝俱令世子代之

諸司朝覲儀

定制天下官三年一入朝自十二月十六日始鴻臚

寺以次引見二十五日後每日方面官隨常朝官入

奉天門行禮府州縣官及諸司首領官吏土官吏俱

午門外行禮正旦大朝以後方面官於奉天殿前序

立知府以下奉天門金水橋南序立如常朝儀

天順三年

令凡方面官入朝遞降京官一等萬歷五年令凡朝

覲南京府尹行太僕寺苑馬寺卿布按二司俱於十

二月十六日朝見外班行禮由右掖門至御前鴻臚

寺官以次引見其鹽運司及知府以下官吏浙江江

西十七日山東山西十八日河南陝西十九日湖廣

南直隸二十日福建四川二十一日廣東廣西二十

二日雲南貴州二十三日北直隸二十四日各外班

行禮至御前引見免朝則止仍候御朝日引見正旦

朝賀俱入殿前行禮凡朝覲官見辭謝恩具
公服正旦具朝服不著朱履常朝俱錦繡

天順實錄三年十二月鴻臚寺言舊制天下朝覲
官至者方面官隨品級序於京官之次則侍郎副
都御史等官當班於布政司之後矣然侍郎副都
御史等官須當奏對班行隔越趨走不便是以前
此方面官往往前後參錯不一今後方面官請遞
降京官一班序立庶朝有定著班無錯襍禮體事
宜兩無妨碍從之著為令

皇太后皇后受朝儀

凡朝賀內使監設皇太后皇后寶座於宮中丹陛儀仗內使執之殿上儀仗女使執之陳女樂於宮門外設皇貴妃幄次於宮門外之西近北設公主幄次於宮門外之東稍南設外命婦幄次於門外之南東西向皇太后皇后服褱衣出閣仗動樂作升座樂止司賓導外命婦由東門入內道東西班侍立訖導皇貴妃衆妃由東門入至陛下拜位贊拜樂作四拜興樂

止導由殿東門入樂作內贊接引至殿上拜位樂止
贊跪妃皆跪皇貴妃致詞曰妾某氏等茲遇履端之
節冬至則云履長恭詣稱賀致詞畢皆俯伏興樂作
復位樂止贊拜樂作四拜興樂止降自東階出司賓
導公主由東門入至陛下拜位以次立行禮如皇妃
儀司賓導外命婦入殿前中道拜位贊拜如儀班首
由西陞升入殿西門樂作內贊接引至殿上拜位班
前及諸命婦皆跪班首致詞曰某國夫人妾某氏等

稱賀賀畢出復位司言跪承旨由殿中門出立露臺
之東南向稱有旨命婦皆跪司言宣旨曰履端之慶
與夫人等共之贊興司言奏宣旨畢皇后興樂作入

內閣門樂止諸命婦出太皇太后朝賀儀同

洪武元年九月

定制如右二十六年重定宮中朝賀儀先日女官設
御座香案至日內設儀仗陳女樂於丹陛東西北向
設箋案於殿東門命婦至宮門司賓引入就位拜女
官具服侍班尚宮尚儀等官詣內奉迎皇太后皇后
具服出樂作贊拜如前儀女官舉箋案由殿東門入
樂作至殿中樂止贊跪命婦皆跪贊宣箋日女官宣
訖贊展箋宣箋女官詣案前展宣訖舉案於殿中命
婦皆興司賓引班首由東階升入殿東門樂作內贊

引至殿中樂止贊跪班首及諸命婦皆跪班首致詞訖皆興由西門出贊拜及司言宣旨皆如儀禮畢凡命婦朝叅文武各以夫品贊拜樂作四拜禮畢出陰雨大寒暑則免後命婦朝賀俱於仁智殿朝東宮妃儀如朝中宮不傳令

大宴儀

制有大宴中宴常宴小宴凡大饗尚寶司設座於奉天殿錦衣衛設黃麾於殿外之東西金吾衛設護衛官二十四人於殿東西教坊司設九奏樂歌於殿內設大樂於殿外立三舞雜隊於殿下光祿寺設酒亭

於御座下西膳亭於御座下東珍羞醢醢亭於酒膳亭
之東西設御筵於御座東西設皇太子座於御座之
東西向諸王以次南東西向羣臣四品以上位於殿
內五品以下位於東西廡司壺尚酒尚食各供事至
期儀禮司請升座駕輿大樂作升座樂止鳴鞭皇太
子親王上殿文武官四品以下由東西門入立殿中
五品以下立丹墀贊拜如儀光祿寺進御筵大樂作
至御前樂止內官進花光祿寺開爵注酒詣御前進

第一爵教坊司奏炎精之曲樂作內外官皆跪教坊
司跪奏進酒飲畢樂止衆官俯伏興贊拜如儀各就
位坐序班詣羣臣散花第二爵奏皇風之曲樂作光
祿寺酌酒御前序班酌羣臣酒皇帝舉酒羣臣亦舉
酒樂止進湯鼓吹饗節前導至殿外鼓吹止殿上樂
作羣臣起立光祿寺官進湯羣臣復坐序班供羣臣
湯皇帝舉筋羣臣亦舉筋贊饌成樂止武舞入奏平
定天下之舞第三爵奏春皇明之曲樂作進酒如初

奏撫安四夷之舞第四爵奏天道傳之曲進酒進湯
如初奏車書會同之舞第五爵奏振皇綱之曲進酒
如初奏百戲承應舞第六爵奏金陵之曲進酒進湯
如初奏八蠻獻寶舞第七爵奏長揚之曲進酒如初
奏採蓮隊子舞第八爵奏芳醴之曲進酒進湯如初
奏魚躍于淵舞第九爵奏駕六龍之曲進酒如初光
祿寺收御爵序班收羣臣盞進湯進大膳大樂作羣
臣起立撤膳奏百花隊舞贊撤案光祿寺撤御案序

班撤羣臣案贊宴成羣臣皆出席北向立贊拜如儀
羣臣分東西立儀禮司奏禮畢駕興樂止以次出其
中宴禮如前但進七爵常宴如中宴但一拜三叩頭
進酒或三或五而止凡宴命婦坤寧宮設儀仗女樂
皇后常服升座皇妃皇太子妃王妃公主亦常服隨
出閣入就位大小命婦各立於座位後丞相夫人率諸
命婦舉御食案丞相夫人捧壽花二品外命婦各舉
食案於皇妃太子妃王妃公主前大小命婦各就

座位奉御執事人分進壽花於殿內及東西廡酒七

行上食五次酌酒進湯樂作止並如儀

洪武元年大宴羣臣於奉

天殿三品以上升殿餘列於丹墀遂定正旦冬至聖節宴護身殿禮二十六年重定大宴禮陳於奉天殿永樂元年以都社禮成大宴十九年以北京郊社宗廟及宮殿成大宴宣德正統間朝官不與者給賜節錢凡立春元宵四月八日端午重陽臘八日永樂間俱於奉天門賜百官宴用樂其後皆宴於午門外不用樂立春日賜春餅元宵日團子四月八日不落莢嘉靖中改不落莢為麥餅端午日涼糕稜重陽日糕臘八日麵俱設午門外以官品序座宣德五年冬久未雪十二月大雪帝示羣臣喜雪詩復賜賞雪宴羣臣進賀章帝擇其寓警戒者錄之而為之序皇太后聖誕正統四年賜宴午門東宮千秋節永樂間賜府

部堂上春坊科道近侍錦衣衛及天下進賢官宴於
文華殿宣德以後俱宴於午門外凡祀園丘方澤祈
穀朝日夕月耕藉經筵日講東宮講讀皆賜飯親蠶
賜內外命婦飯蒸修校勘書籍開館登書成皆賜閤
臣宴九年考滿賜宴於禮部九
卿侍宴新進士賜宴曰恩榮

臣等謹按寶錄有大祀禮成行慶成禮詳郊社宗
廟考中若慶成宴之儀則亦畧具於右故不復重
出也

頒詔儀

設御座於奉天殿設寶案於殿東陳中和韶樂於殿

內設大樂於午門及承天門外設宣讀案於承天門
上西南向清晨校尉擎雲蓋於殿內簾前百官朝服
班承天門外公侯班午門外東西向皇帝皮弁服升
殿如儀禮部官捧詔書詣案前用寶訖置雲蓋中校
尉擎雲蓋由殿東門出大樂作自東陞降由奉天門
至金水橋南午門外樂作公侯前導迎至承天門上
鳴贊唱排班文武官就位樂作四拜樂止宣讀展讀
官升案稱有制衆官跪禮部官捧詔書授宣讀官宣

訖禮部官捧置雲蓋中贊禮唱俯伏興樂作四拜樂止舞蹈山呼又四拜儀禮司奏禮畢駕興禮部官捧

詔書分授使者百官退

洪武二十六年定制如右嘉靖六年續定鴻臚官設詔案

錦衣衛設雲蓋盤於奉天殿內東別設雲盤於承天門上設綵輿於午門外鴻臚官設宣讀案於承天門上百官入丹墀侍立帝冕服升殿如朝儀翰林院官捧詔書從至御座前東立百官入班四拜出至承天門外贊頌詔翰林院官捧詔書授禮部官捧至雲蓋案上校尉擎雲蓋俱從殿左門出至午門外捧詔至綵輿內公侯伯三品以上官前導迎至承天門上宣讀贊拜俱如上儀禮部官捧詔書授錦衣衛官置雲蓋匣中以綵索繫之龍竿頌降禮部官捧至龍亭內鼓樂迎至禮部授使者頒行隆慶六年詔出至皇極門

即奏禮
畢駕還

進表箋儀

凡王府遇聖節及冬至正旦先期陳設畢王冕服就位四拜詣香案前跪進表訖復位四拜三舞蹈山呼又四拜百官朝服隨班行禮進中宮箋儀如之惟不舞蹈山呼進皇太子箋王皮弁服行八拜禮百官朝服隨班行禮凡進賀表箋皇子封王者於天子前自稱曰第幾子某王某稱天子曰父皇陛下皇后母后

殿下若孫則自稱曰第幾孫某王某稱天子曰祖父
皇帝陛下皇后曰祖母皇后殿下若弟則自稱曰第
幾弟某封某稱天子曰大凡皇帝陛下皇后曰尊嫂
皇后殿下姪則自稱曰第幾姪某封某稱天子曰伯
父皇帝陛下叔父皇帝陛下皇后曰伯母皇后殿下
叔母皇后殿下若尊屬則自稱曰某封臣某稱天子
曰皇帝陛下皇后曰皇后殿下若從孫以下則稱從
孫再從孫三從孫某封某皆稱皇帝皇后曰伯祖叔

祖皇帝陛下伯祖母叔祖母皇后殿下

明初定制如右至世宗時

始令各王府表箋俱用聖號不得用家人禮凡在外百官進賀表箋前一日結綵於公廡及街衢文武官各齊沐宿本署清晨設龍亭於庭中設儀仗鼓樂於露臺設表箋案於龍亭前香案於表箋案前設進表箋官位於龍亭東鼓初嚴各官具服次嚴班首具服詣香案前滌印用印訖以表箋置於案退立幕次三嚴各官入班四拜班首詣香案前贊跪眾官皆跪執事者以表箋跪授班首班首跪授進表官進表官跪受置龍亭中班首復位各官皆四拜三舞蹈山呼四拜金鼓儀仗鼓樂百官前導進表官在龍亭後東至郊外置龍亭南向儀仗鼓樂陳列如前文武官侍立班首取表箋授進表官進表官就於馬上受表即行百官退

蕃王朝見陞辭儀

凡蕃王朝見設蕃王及從官次於午門外蕃王拜位於丹墀中道稍西從官在其後設方物案於丹墀中道東西知班二位於蕃王拜位北引蕃王舍人二位於蕃王從官北鼓三嚴百官入侍執事舉方物案蕃王隨案由西門入至殿前丹墀西侍立皇帝服通天冠絳紗袍御殿蕃王及從官各就拜位以方物案置拜位前贊四拜訖引班導蕃王升殿宣方物官以方

物狀由西陞升入殿西門內贊引至御前贊拜番王
再拜跪稱賀致詞宣方物官宣狀承制官宣制訖番
王俯伏興再拜出殿西門復位贊拜番王及其從官
皆四拜禮畢皇帝興番王以下出樂作樂止如常番
王陞辭如朝見儀不傳制中書省率禮部官送至龍

江驛宴如初

洪武二年定制凡番王至龍江驛遣侍儀通贊二人接伴館人陳番王座於廳

西北東向應天府知府出迎設座於廳東南西向以賓主接見宴畢知府還番王送於門外明日接伴官送番王入會同館禮部尚書即館宴勞尚書至番王服其國服相見宴饗迎送俱如龍江驛酒行用樂明

日中書省奏聞命官一員詣館如前宴勞侍儀司以
番王及從官具服於天界寺習儀三日朝見儀如右
二十七年四月以舊儀煩命更定凡番國來朝先遣
禮部官勞於會同館明日各具其國服如嘗賜朝服
者則服朝服於奉天殿朝見行八
拜禮凡遇宴會番王居侯伯之下

番國遣使朝貢儀

番使至驛遣應天府同知禮待明日至會同館中書
省奏聞命禮部侍郎於館中禮待如儀宴畢習儀三
日擇日朝見陳設儀仗及進表俱如儀承制官請使
者前稱有制使者跪宣制曰皇帝問使者來時爾國

王安否答畢俯伏興再拜承制官稱有後制使者跪
宣制曰皇帝又問爾使者遠來勤勞使者俯伏興再
拜承制官復命訖使者復四拜禮畢皇帝興樂作止
如儀

錫蕃國宴儀

凡錫宴陳御座於謹身殿設皇太子座於御座東諸
王座於皇太子下西向設蕃王座於殿西第一行東
向設文武官座於第二第三行東西向酒九行上食

五次大樂細樂間作呈舞隊蕃國從官坐於西廡下
酒數食品同不作樂



欽定續文獻通考卷八十八

欽定四庫全書

史部

欽定續文獻通考卷八十九

給事中^臣陳化龍覆勘

總校官內閣中書^臣孫溶

欽定四庫全書

欽定續文獻通考卷八十九

王禮考

上尊號徽號

宋寧宗寶慶三年十二月詔上皇太后尊號命有司具

儀注

詔曰皇太后宜上尊號有司詳具儀注朕當親率羣

臣詣慈明殿奉上冊寶

理宗紹定三年加上皇太后尊號亦親率羣臣詣慈明殿上冊寶與是年同

遼奉冊皇太后儀

前期陳設於元和殿如皇帝受冊之儀至日皇帝御弘政殿冊入侍從班入門外金吾列仗文武分班侍中解劍奏中嚴宣徽使請木契喚仗皆如之樂工入閣使門外文武班中間立喚承受官聲喏趨至閣使後立閣使鞠躬揖稱奉敕喚仗承受官鞠躬聲喏揖

引聲奉敕喚仗文武合班再拜殿中監押仗入文武
官入亦如之宣徽使押內諸司供奉官天橋班候皇
太后御紫宸殿乘平頭輦童子女童隊樂引至金鑾
門閣使奏內諸司起居訖贊引駕自下先行至元和
殿皇太后入西北隅閣內更衣侍中解劍上殿奏外
辦宣徽受版入奏侍中降復位協律郎舉麾樂作大
樂令太常卿導引皇太后升坐宣徽使贊扇合簾捲
扇開樂止符寶郎奉寶置皇太后坐右左右金吾大

將軍對揖鞠躬奏軍國內外平安東上閣門副使引丞相東門入西上閣門副使引親王西門入通事舍人引文武班入如儀樂作至位樂止文武班趨進相向再拜退復位東西上閣門使宣徽使自弘政殿引皇帝御肩輿至西便門下引入門樂作至殿前位樂止宣徽使贊皇帝拜問皇太后聖躬萬福拜皇帝御西閣坐合班起居如儀北府宰相押冊中書樞密令史八人舁冊東西上閣門使引冊宣徽使引皇帝送

冊樂作至殿前置冊位樂止宣徽使贊皇帝再拜稱
萬歲羣臣陪位揖翰林學士四人太將軍四人昇冊
皇帝捧冊行三舉武授冊昇之西階上殿樂作置太
后坐前樂止皇帝冊西面東立舍人引丞相當殿再
拜三呼萬歲解劍西階上殿樂作至讀冊位樂止俛
伏跪讀冊訖俛伏三呼萬歲復班位宣徽使引皇帝
下殿樂作至殿前位樂止皇帝拜舞蹈拜訖引皇帝
西階上殿至皇太后坐前位俛伏跪致詞訖俛伏興

引西階下至殿前位拜舞蹈拜鞠躬侍中臨軒宣太后答稱有制皇帝再拜宣訖引皇帝上殿樂作至西閣樂止丞相親王侍從文武合班贊拜舞蹈三呼萬歲如儀丞相上賀侍中宣答如儀丞相以下出舉樂出門樂止侍中奏禮畢宣徽使索扇扇合下簾皇太后起舉樂入閣樂止文武官出門外分班侍從兵部吏部起居金吾仗出如儀閣使奏放仗皆如皇帝受冊之儀

金奉冊皇太后儀

海陵天德二年正月詔有司擇日奉冊唐殷國妃岐國太妃仍別建宮名合行典禮禮官檢詳條奏以聞其日質明有司各具繖扇侍衛如儀及兵部約量差軍兵并文武百官詣兩宮迎請引導皇太后入內並赴受冊殿入御幄侍衛如式次奉冊太尉等俱以冊置于案皆盛以匣覆以帕詣別殿門外幄次教坊提點率教坊入侍衛官各就列皇帝常服乘輿至別殿

後幄次通事舍人引宣徽使版奏中嚴復位少頃又
奏外辨幄簾捲教坊樂作扇合兩宮皇太后出自後
幄並即御座南向扇開樂止

分左右
少退

通事舍人引文

武百僚班左入依品重行西向立定通事舍人喝起
居班依常朝例起居七拜訖引文武百僚班分東西
相向立通事舍人太常博士贊引太常卿前導押冊
官押冊而行奉冊太尉讀冊中書令舉冊官以次從
之次押寶官押寶而行奉寶司徒讀寶侍中舉寶官

以次從之俱自正門入教坊樂作至殿庭西階下少
東北向於褥位少置樂止冊北寶南通事舍人太常
博士贊引太常卿前導押冊官押冊升樂作奉冊太
尉等從之進至兩宮太后座前褥位樂止

兩宮冊寶
齊上齊讀

舉冊官夾侍奉冊太尉各措笏北向跪俛伏興退立
讀冊中書令俱進向冊前跪奏稱攝中書令具官臣
某謹讀冊舉冊官單跪舉中書令各措笏讀訖執笏
俛伏興措笏奉冊興于位東迴冊函北向並進跪置

于御座前褥位中書令舉冊官俱降還位奉冊太尉
並降階東向以俟押寶官押寶升樂作奉寶司徒等
從之進至兩宮皇太后座前褥位樂止舉寶官夾侍
奉寶司徒各措笏北向跪俛伏興退立讀寶侍中俱
進當寶前跪奏稱攝侍中具官臣某謹讀寶舉寶官
單跪對舉侍中各措笏讀訖執笏俛伏興措笏奉寶
興于位東迴寶西北向並進跪置于御座前褥位冊
之南通事舍人太常博士贊引太尉司徒以次應行

事官俱降自西階復本班序立宣徽使一員詣皇帝御幄前俛伏跪奏臣某謹請皇帝詣兩宮皇太后前行稱賀之禮俛伏興贊引皇帝再拜又奏請北向跪皇帝賀曰嗣皇帝臣某言

云云

俛伏興又再拜訖又

奏請皇帝少立內侍承旨退西向稱兩宮太后旨

云

云皇帝再拜宣徽使前引皇帝歸幄常服乘輿還內侍衛如來儀應階下文武百僚重行立定通事舍人喝拜在位皆再拜通事舍人引太師詣西階升俛伏

跪奏稱文武百僚具官臣某等稽首言皇太后殿下
顯對冊儀永安帝養仰祈福壽與天同休俛伏興降
自西階復位立定通事舍人贊在位官皆再拜舞蹈
三呼萬歲又再拜宣徽使升自東階取旨退臨階西
向稱兩宮皇太后旨通事舍人贊在位者皆再拜畢
宣曰公等忠敬盡心推崇協力膺茲令典感愧良深
宣訖還位通事舍人贊謝宣諭拜在位官皆再拜舞
蹈三呼萬歲又再拜通事舍人分引應北向官各分

班東西立宣徽使升自東階奏稱具官臣等言禮畢
降還位扇合皇太后並興教坊樂作降座還殿後幄
次扇開樂止通事舍人引宣徽使奏解嚴中書侍郎
等各帥捧冊床官升殿跪捧冊並置於床次門下侍
郎等各帥捧寶床官升殿跪捧寶並置於床訖通事
舍人引詣東上閣門投進所司文武百僚以次出皇
太后常服乘輿各還本宮引導如來儀文武百僚詣
東上閣門拜表賀皇帝退禮畢各赴本宮受內外命

婦稱賀所司預於殿內設皇太后御座司賓引內外
命婦于殿庭北向依序立尚儀奏請皇太后常服即
座司贊曰再拜命婦皆再拜司賓引班首詣西階升
跪賀稱妾某氏等言伏惟皇太后殿下天資聖善昭
受鴻名凡在照臨不勝欣忭興降階復位司贊曰再
拜內外命婦皆再拜尚宮承旨降自西階于命婦之
北東向立司贊曰再拜在位者皆再拜尚宮乃宣答
曰膺茲典禮感愧良深司贊曰再拜在位者皆再拜

退赴別殿賀皇帝亦如賀皇太后之儀惟不致詞不

宣答

臣等謹按海陵本紀天德二年正月癸巳尊嫡母
圖克坦氏及母大氏皆為皇太后名圖克坦氏宮
曰永壽大氏宮曰永寧志所云唐殷國妃者海陵
之嫡母圖克坦氏也岐國太妃者生母大氏也

元太皇太后上尊號進冊寶儀

前期二日儀鸞司設進發冊寶案於大明殿御座之

前掌謁設進冊寶案于太皇太后殿座榻前設受冊寶案于座榻上並冊西寶東侍儀司設冊使副位于中北面冊官位右寶官位左禮儀使位于前以北為上太皇太后殿廷亦如之至期大昕羣臣皆公服叙位闕前侍儀使禮儀使引冊使引冊奉冊舉冊讀冊捧冊官由月華門入侍儀使禮儀使引冊副引寶奉寶舉寶讀寶捧寶官由日精門入至露階下依板位立侍儀使捧牙牌入至寢殿前跪報外辦內侍入

奏出傳制曰可侍儀使俛伏興皇帝出閣升輦鳴鞭
三入大明殿升御座鳴鞭三司晨報時鷄唱畢侍儀
使禮儀使引冊使以下陞自東階由左門入至御榻
前相向立掌儀贊曰奏中嚴侍儀使捧牙牌跪奏曰
中嚴又贊曰就拜曰興曰平身曰復位曰禮儀使稍
前跪曰冊使以下皆跪禮儀使奏請進發太皇太后
冊寶掌儀贊曰就拜曰興曰平身曰復位曰內謁者
稍前曰措笏奉冊寶上進曰冊使副捧冊寶官稍前

曰搢笏曰內謁者跪進冊寶皇帝興以冊授冊使冊
使跪受興以授捧冊官出笏以寶授冊副冊副跪受
興以授捧寶官出笏侍儀使禮儀使引冊引寶官導
冊寶由正門出冊使以下奉隨至階下掌儀贊曰以
冊寶置於案曰出笏復位方輿昇行樂作侍儀使禮
儀使引冊引寶前導冊使以下奉隨至興聖宮前奠
案樂止侍儀使以導從入至太皇太后寢殿前跪報
外辦掌謁入啟出傳旨曰可侍儀使俛伏興侍儀使

掌謁前導太皇太后陞殿導太皇太后時侍儀使入
至大明殿跪奏冊寶至興聖宮請行禮駕輿鳴鞭三
侍儀使前引導從至興聖宮陞御座侍儀使出至案
所樂作方輿入至露階下奠案冊使副立于案前冊
官東向寶官西向方輿分退立于兩廡樂止尚引引
殿前班入起居位相向立起居拜舞如元正儀禮畢
宣贊唱曰各恭事贊引冊使以下退至起居位通班
舍人唱曰攝某官具官

或太尉具官無常

臣某以下起居引贊

贊曰鞠躬曰平身進入丹墀知班唱曰班齊宣贊唱
曰拜通贊贊曰鞠躬曰拜曰興曰拜曰興曰平身宣
贊唱曰各恭事進至案前依位立宣贊唱曰太尉以
下進上册寶掌儀贊曰捧册寶官稍前措笏捧册寶
侍儀使引册寶官前導册使奉隨至御榻進册寶案
前掌儀唱曰跪捧册寶官皆跪曰以册寶置於案曰
捧册寶官出笏復位曰太尉以下皆跪曰讀舉册寶
官興俱至案前跪掌儀贊曰舉册官措笏取册于匣

置于盤對舉曰讀冊讀冊官稱臣某謹讀冊讀畢舉冊官納冊于匣掌儀贊曰出笏曰舉寶官措笏取寶於盃對舉曰讀寶讀寶官稱臣某謹讀寶讀畢舉寶官納寶于盃掌儀贊曰出笏曰就拜曰興曰平身曰衆官皆興曰復位曰太尉司徒奉冊寶官稍前曰捧冊寶官稍前曰措笏曰捧冊寶上進曰皇帝躬授太皇太后冊寶太皇太后以冊寶授內掌謁內掌謁置于案皇帝興進酒太皇太后舉觴飲畢皇帝復御座

畢掌儀贊曰衆官皆復位侍儀使引冊使以下分左
右出就位皇帝率皇后及諸妃公主降丹墀北面拜
賀陞殿皇太子及諸王拜賀陞殿典引引百官入就
起居位通事舍人唱曰文武百僚具官臣某以下起
居曰鞠躬曰平身引至丹墀拜位知班報班齊宣贊
唱曰拜通贊贊曰鞠躬曰拜曰興曰拜曰興曰平身
侍儀使詣班首前請進酒雙引至殿宇下褥位立俟
舞旋列定通贊唱曰分班樂作侍儀使引班首由南

東門入宣徽使奉隨至御榻前班首跪曲終班首祝
贊曰冊寶禮畢臣等不勝欣忭願上太皇太后皇帝
億萬歲壽宣徽使應曰如所祝班首俛伏興詣進酒

位

以下並同
元正儀

皇太后上尊號進冊寶儀

同前儀

太皇太后加上尊號進冊寶儀

同前儀

明上尊號徽號儀

明制天子登極奉母后或母妃為皇太后則上尊號其後或以慶典推崇皇太后則加二字或四字為徽號世宗時上兩宮皇太后增至八字上徽號致詞而上尊號則止進寶冊上尊號自宣宗登極尊皇太后始先期遣官祭告天地宗社帝親告太宗皇帝大行皇帝几筵是日鳴鐘鼓百官朝服奉天門設冊寶綵輿香亭中和韶樂及大樂設而不作內官設皇太后

寶座陳儀仗于宮中設冊寶案于寶座前設皇帝拜
位于丹陛正中親王拜位于丹墀內女樂設而不作
皇帝冕服御奉天門奉冊寶官以冊寶置輿中內侍
舉輿皇帝隨輿降階陞輅百官於金水橋南北向立
輿至皆跪過輿隨至思善門外橋南北向立皇帝至
思善門內降輅皇太后陞座輿至丹陛皇帝由左門
入至陛右北向立親王冕服各就位奏四拜皇帝及
王以下皆四拜奉冊寶官以冊寶由殿中門入立于

左皇帝由殿左門入至拜位跪親王百官皆跪奏措
圭奏進冊奉冊官以冊跪進皇帝受冊獻訖執事官
跪受置案左奏進寶奉寶官以寶跪進皇帝受寶獻
訖執事官跪受置案右奏出圭奏宣冊執事官跪宣
讀皇帝俛伏興由左門出至拜位奏四拜傳唱百官
同四拜禮畢駕興是日皇帝奉皇太后謁奉先殿及
几筵行謁謝禮禮畢皇太后還宮服燕居冠服陞座
皇帝率皇后皇妃親王公主及六尚等女官行慶賀

禮翌日外命婦四品以上行進表箋禮宣宗宣德以後儀同英宗正統初尊太皇太后儀同天順八年二月增命婦致詞云某夫人妾某氏等恭惟皇太后陛下尊居慈極永膺福壽孝宗弘治十八年上兩宮尊號改皇太后致詞云尊居慈闈茂隆福壽世宗嘉靖元年二月上尊號以四宮行禮過勞分為二日又以武宗服制未滿莊肅皇后免朝賀命婦賀三宮亦分日上徽號自英宗天順二年正月奉皇太后始致詞

云嗣皇帝臣伏惟皇太后陛下功德兼隆顯崇徽號永膺福壽率土同歡命婦進表慶賀致詞云某夫人妾某氏等恭惟皇太后陛下德同坤厚允協徽稱福壽無疆輿情歡戴餘如常儀後上徽號及加上徽號仿此憲宗成化二十三年禮部具儀上未及皇太子妃禮特命增之

冊立

冊封附

遼冊皇后儀

至日南北臣僚內外命婦詣端拱殿幕次皇后至閣
侍中奏中嚴引命婦班入就東西相向位立皇帝臨
軒命使發冊使副押冊至端拱殿門外侍中奏外辨
所司承旨索扇扇合舉麾樂作皇后出閣升坐扇開
簾捲偃麾樂止引命婦合班面殿起居八拜皇后降
坐樂作至殿下褥位樂止引冊入置皇后褥位前侍
中傳宣皇后四拜命婦陪位皆拜引讀冊官至皇后
褥位前俛伏跪讀訖皇后四拜陪位者皆拜引皇后

升殿使臣引冊置皇后坐前冊案退西向侍立命婦
當殿稱賀四拜引班首東階上殿致詞訖東階下殿
復位四拜侍中奏宣答稱有教旨四拜宣答訖四拜
班首上殿進酒皇后賜押冊使副等酒訖侍中奏禮
畢承旨索扇樂作皇后起入閣樂止分引命婦等東
西門出

皇帝納后儀

擇吉日至日昃族畢集吉旦后出私舍坐於堂皇帝

遣使及媒者以牲酒饗餼至門執事者以告使及媒者入謁再拜平身立少頃拜進酒於皇后次及后之父母宗族兄弟酒徧再拜納幣致詞再拜訖后族皆坐特哩袞夫人四拜請就車后辭父母伯叔父母兄各四拜宗族長者皆再拜皇后升車父母飲后酒致戒詞徧及使者媒者送者發輶伯叔父母兄飲后酒如初教坊遮道贊祝后命賜以物后族追拜進酒遂行將至宮門宰相傳勅賜皇后酒徧及送者既至特

哩衮率皇族奉迎再拜皇后車至便殿東南七十步
止特哩衮夫人請降車負銀罍捧滕履黃道行後一人
張羔裘若襲之前一婦人捧鏡却行置鞍於道后過
其上乃詣神主室三拜南北向各一拜酌酒向謁者
一拜起居訖再拜次詣舅姑御容拜奠酒選皇族諸
婦宜子孫者再拜之授以罍滕又詣諸帝御容拜奠
酒神賜襲衣珠玉珮飾拜受服之后妙若妹陪拜者
各賜物皇族迎者后族送者徧賜酒皆相偶飲訖后

坐別殿送后者退食於次媒者傳旨命送后者列於殿北族皇帝即御坐選皇族尊者一人當與坐主婚禮命執事者往來致詞於后族引后族之長率送后者升當御坐昏再拜又一人少進附奏送后之詞退復位再拜后族之長及送后者向當與者三拜南北向各一拜向謁者一拜后族之長跪問聖躬萬福再拜復奏送后之詞又再拜當與者與媒者行酒三周命送后者再拜昏坐終宴翼日皇帝晨興詣先帝御

容拜奠酒訖復御殿宴后族及羣臣皇族后族偶飲
如初百戲角觝戲馬較勝以為樂又翼日皇帝御殿
賜后族及贐送后者各有差受賜者再拜進酒再拜
皇帝御別殿有司進皇后服飾之籍酒五行送后者辭
訖皇族獻后族禮物后族以禮物謝當興者禮畢

冊皇太子儀

前期一日設幄坐於宣慶殿設文武官幕次於朝堂
并殿廷板位大樂令陳宮縣皆如皇帝受冊儀守官

設皇太子次於朝堂北西向乘黃令陳金輅朝堂門外西向皇太子儀仗笳簫鼓吹等陳宣慶門外典儀設皇太子版位於殿橫街南近東北向設文武官五品以上位於樂縣東西餘官如常儀至日門下侍郎奉冊中書侍郎奉寶綬各置於案令史二人絳服對舉案立寶案在橫街北西向冊案在北門下侍郎中書侍郎並立案後侍中版奏中嚴皇太子遠遊冠絳紗袍秉珪出太子舍人引入就版位北面殿立東宮

官三師以下皆從立皇太子東南西向太子入門樂作至位樂止典儀贊皇太子再拜在位者皆再拜中書令立太子東北西向門下侍郎引冊案中書侍郎取冊進授中書令退復位傳宣官稱有制皇太子再拜傳宣訖再拜中書令跪讀冊訖俛伏興皇太子再拜受冊退授左庶子中書侍郎取寶進授中書令皇太子進受寶退授左庶子中書令以下退復位昇案者以案退典儀贊再拜皇太子拜在位者皆再拜太

子舍人引皇太子退樂作出門樂止侍中奏禮畢皇太子升金輅左庶子以下夾侍儀仗鼓吹等並列宣慶門外三師三少諸宮臣於金輅前後導從鳴鑣而行還東宮宮庭先設仗衛如式至宮門鑣止皇太子降金輅舍人引入就位坐文武宮臣序班稱賀禮畢冊王妃公主儀

至日押冊使副并讀冊等官押冊東便門入持節前導至殿冊案置橫街北少東引使副等面殿立而鞠

躬侍中臨軒稱有制皆再拜鞠躬宣制訖舞蹈五拜
引冊於宣慶門出使副等押領儀仗冊案赴各私第
廳前向闕陳列設傳宣受冊拜禱冊案置褥左去幕
蓋使副案右序立受冊者就位立傳宣稱有制再拜
宣制訖昇冊人舉冊匣於褥前跪捧引讀冊者與受
冊者皆俛伏跪讀訖皆俛伏興受冊者謝恩國王五
拜王妃公主四拜

金冊皇后儀

天德二年十月九日冊妃圖克坦氏為皇后前一日
儀駕司設座勤政殿南向設羣臣次於朝堂大樂令
展宮縣於殿庭設協律郎舉麾位於樂縣西北東向
閤門設百官班位於庭並如常朝之儀又設典儀位
於班位之東北贊者二人在南少却俱西向設冊使
副位於殿門外之東又設冊使副受命位於百官班
前又設冊寶幄次二於殿後東廂俱南向其日諸衛
勒所部畧列黃麾細仗於庭符寶郎奉八寶置於左

右吏部侍郎奉冊禮部侍郎奉寶匣皆置於床訖出就門外班大樂令協律郎樂工典儀贊者各入就位羣官等依時刻集朝堂俱就次各服朝服侍中約刻版奏請中嚴通事舍人引羣官入就庭東西相向立以北為上又引冊使副立於東偏門西向門下侍郎引主節奉節立於殿下東廊橫街北中書令中書侍郎帥舉捧寶官奉寶床立於冊床之南俱西面侍中版奏

外辦殿上索扇協律郎舉麾宮縣作皇帝服通天冠絳紗袍出自東房曲直華蓋警蹕侍衛如常儀即座南向坐簾捲樂止通事舍人引冊使副入宮縣作使副就受命位侍中中書令門下侍郎中書侍郎舉捧官依舊西面立羣臣合班橫行北面如常朝之儀立定典儀曰再拜贊者承傳班首以下羣官在位者皆再拜班首問起居又再拜閤門官引攝侍中出班承制降詣使副東北西向稱有制使副稍前鞠躬再拜攝

侍中宣制曰命公等持節授后冊寶宣制訖又俱再拜侍中還班門下侍郎引主節詣冊使所主節以節授門下侍郎門下侍郎執節西向授太尉太尉受付主節主節立於使副之左右門下侍郎退還班位中書侍郎引冊床門下侍郎引寶床立於冊使東北西向以次授與太尉太尉皆捧受冊床置於北寶床置於南侍中中書令禮儀使舉捧冊寶官及舁床者退於東西塲道之左右相向立門下侍郎中書侍郎退

還班位典儀曰再拜贊者承傳羣官在位者皆再拜訖
分班東西相向立捧舉舁冊寶牀者進冊牀先行讀冊
官次之寶牀次行讀寶官次之舉舁官各分左右通事
舍人引冊使隨之以行持節者前導太尉初行宮縣樂作
出殿門樂止攝侍中出班升殿奏侍中臣言禮畢殿上
索扇簾降宮縣作降座入自東房樂止通事舍人引羣
官在位者以次出俟太尉司徒復命禮畢還內先是有
司預設太尉司徒本品草車鹵簿於門外至殿門左右

排列俟使副出鼓吹振作禮儀使舉捧官執節者并
擡舁人以冊寶少駐於泰和門太尉司徒及讀冊寶
官暫歸幕次內侍閣門引入泰和殿俟至殿下位鼓
吹止有司預供張泰和殿設皇后座於扆前殿上垂
簾又設東西房於殿之左右稍北又設受冊位於殿
庭西階之南東向又設內命婦次於殿之左右大樂
令設宮縣於庭協律郎設舉麾位於殿上又設冊寶
次於門外又設行事官次於門左右又設外命婦次

於門外之內其日諸衛於殿門外略設黃麾細仗有
司設二步障於殿之西階簾前設扇左右各十紅繖
一在西階欄之外又設舉冊寶案位於使副之前北
向又設宣徽使位於北廂南向司贊設內外命婦以
下陪列位於殿庭埽道之左右每等重行異位北向
內命婦在後又設司贊位於東階東南贊者二人在
南少退俱西向質明執事官大樂令等各就位皇后
常服乘龍飾肩輿至泰和殿後閣近仗導衛如常儀

宣徽使奏中嚴冊使副入門宮縣作俟冊使度中立樂止冊在北寶在南使副立於床後禮儀使帥持節者立於前舉捧冊寶官立於冊寶床左右讀冊寶官各立於其後宣徽使奏外辦內侍閣門官引后出後閣宮縣作簾捲皇后降自西階左右步障織扇從至階下望勤政殿御閣所在立樂止冊使進立於右宣曰有制閣門使內侍贊再拜冊使宣曰制遣太尉臣某司徒臣某恭授后冊寶閣門使內侍贊再拜冊使

少退中書令侍中及舉捧官率擡舁人奉冊寶以次
進於前宮縣作冊寶床自東階升並置於殿之前楹
間冊床在北寶床在南中留讀冊寶官立位並去帕
又蓋擡舁人執之退立於西朶殿舉擡官分左右相向
立請冊寶官各立於床之東西向立既定樂止閣門
使內侍贊再拜捧謝表官以表授左立內侍內侍以
授后受訖以付右立內侍內侍持表立於右閣門使
贊再拜訖冊使退宮縣作持表內侍以表付閣門官

隨冊使行冊使副至門鼓吹振作如來儀入西偏門鼓吹止冊使副至御閣所在俛伏跪奏太尉臣某司徒臣某奉制授冊寶禮畢俛伏興退持表閣門官進表近侍接入進讀訖退初冊使退及門樂止閣門內侍引后自西階升殿宮縣作繖扇止於簾外退於左右朵殿前步障止於階下卷之后於座前南向立樂止中書令詣冊床南立北向稱中書令臣某謹讀冊讀畢降自東階立於欄外第一墀上西向次侍中詣

寶床南立北向揖稱侍中臣某讀寶讀畢降階立於中書令之北西向內侍閣門引升座宮縣作坐定樂止舉捧官以次抬擡舁人持帕蓋覆匣床奉置殿之左右冊床在東寶床在西置訖舉捧官以次降階立於中書令侍中之後立定合班北向閣門贊再拜拜訖降東階退出殿門其擡舁人置冊寶床於東西訖各由朶殿下階於侍中等班後直出殿門以俟復入擡舁入宮受冊表謝訖內侍跪奏禮畢閣門引內外

命婦陪立者以次進就北向位班首初行宮縣作至位樂止閣門曰再拜命婦皆再拜閣門引班首自西階升樂作至階樂止進當座前北向躬致稱賀訖降自西階樂作至位樂止閣門曰再拜舍人承傳命婦等皆再拜閣門使前承命降自西階詣命婦前西北東向稱有教旨命婦等皆拜閣門使宣曰祇奉聖恩授以冊寶榮幸之至兢厲增深所賀知舍人曰再拜命婦皆再拜訖內侍引內命婦還宮班首初行樂作

出門樂止內侍引外命婦出次宣徽使奏稱禮畢降
座宮縣作入自東房樂止歸閣宮縣作至閣樂止更
常服內侍承教旨宣外命婦入會並如常儀會畢閣
門引外命婦降階橫班北向舍人曰再拜訖以次出
還宮如來儀中書門下侍郎復以引進司帥擡昇人
進冊寶入內付與都點檢司退別日會羣臣會妃主
宗室等賜酒設食簪花教坊作樂如內宴之儀十一
日朝永壽永寧兩宮皇后既受冊越二日內侍設座

於所御殿南向其日夙興宣徽使版奏中嚴質明諸侍衛宮人俱詣寢殿奉迎宣徽使版奏外辦后首飾禕衣御車內侍前導降自西階以出侍衛如常儀至太后之裏門外降車障扇侍衛如常儀入立於西廂東向將至宣徽使版奏請中嚴既降車宣徽使版奏外辦太后常服宣徽使引升座南向宣徽使引后進升自西階北面再拜進跪致謝詞存撫賜酒食並如家人之儀禮畢宣徽使贊再拜訖宣徽使引降自西

階以出出門宣徽使奏禮畢降座回宮

冊皇太子儀

大定八年正月冊皇太子禮官擬奏皇太子乘輿至
翔龍門東宮官導從不乘馬冊皇太子前三日遣使
同日奏告天地宗廟冊前一日宣徽院帥儀鸞司設
御座於大安殿當中南向設皇太子次於門外之東
西向又設文武百官應行事官東宮官等次於門外
之東西廊又設冊寶幄次於殿後東廂俱南向又設

受冊位於殿庭橫階之南工部官與監造冊寶官公服自製造所導引冊寶床由宣華門入約宣徽院同進呈畢赴幄次安置大樂令帥其屬展樂縣於庭其日兵部帥其屬設黃麾仗於大安殿門之內外其日質明文武百僚應行事官並朝服入次東宮官各朝服自東宮乘馬導從至左翔龍門外下馬各就次通事舍人分引百官入立班東西相向次引侍中中書令門下侍郎中書侍郎及捧舁冊寶官詣殿後幄次前

立少頃奉冊寶出幄次由大安殿東降至庭中褥位
權置訖奉引冊寶官立於其後皇太子服遠遊冠朱
明衣出次執圭三師三少已下導從立於門外侍中
奏中嚴符寶郎奉八寶由東西偏門分入升置御座
之左右侍中奏外辦內侍承旨索扇扇合皇帝服通
天冠絳紗袍以出曲直華蓋侍衛如常儀鳴鞭宮縣
樂作皇帝出自東序即御座爐烟升扇開簾捲樂止
典儀贊引皇太子入門宮縣樂作至位樂止師少已

下從入立於皇太子位東南南向典儀贊皇太子再拜播圭舞蹈又再拜奏聖躬萬福又再拜引近東西向立師少以下并奉引冊寶官等各赴百官東班樂作至位樂止通事舍人引百官俱橫班北向典儀贊拜在位官皆再拜播笏舞蹈又再拜起居又再拜畢百官各還東西班師少以下并行事官各還立位典儀贊引皇太子赴受冊位樂作至位樂止侍中承旨稱有制皇太子以下應在位官皆再拜躬身侍中宣

制曰冊某王為皇太子又再拜通事舍人太常博士引中書令詣讀冊位中書侍郎引冊匣置於前捧冊官西向跪捧皇太子跪讀畢俛伏興皇太子再拜中書令詣捧冊位奉冊授皇太子搢圭跪受冊以授右庶子右庶子跪受皇太子俛伏興右庶子以冊興置於床中書令以下退復本班次通事舍人太常博士引侍中詣奉寶位門下侍郎引寶盃立於其右侍中奉寶授皇太子搢圭跪受以授左庶子左庶子跪受

皇太子俛伏興左庶子以寶輿置於床侍中以下退復本班典儀贊再拜畢引皇太子退初行樂作左右庶子帥其屬舁冊寶床以出出門樂止侍中奏禮畢內侍承旨索扇扇合簾降鳴鞭樂作皇帝降座入自西序還後閣侍衛如來儀扇開樂止侍中奏解嚴所司承旨放仗衛以次出皇太子入次改服公服還東宮導從如來儀冊後二日兵部設黃麾仗於仁政殿門之內外陳設並如大安殿之儀百官服朝服皇太

子公服至次改服遠遊冠朱明衣通事舍人引百官
入至階下立班東西相向典儀引皇太子執圭出次
立於門外侍中奏中嚴少頃又奏外辦皇帝出自東
序即座簾捲通事舍人引百官俱橫班北向典儀贊
拜在位官皆再拜搢笏舞蹈又再拜起居又再拜訖
分班皇太子捧表入至拜表位立俟閣門使將至單
跪捧表閣門使接表皇太子俛伏興典儀贊再拜搢
圭舞蹈又再拜俟讀表畢侍中承旨退稱有制典儀

贊再拜興躬身侍中宣訖典儀贊再拜搢圭舞蹈又再拜引皇太子退侍中奏禮畢扇合鳴鞭入西序還後閣侍衛如來儀侍中奏解嚴放仗百官以次出後二日百官奉表稱賀如常儀

元冊皇后儀

前期二日儀鸞司設發冊寶案於大明殿御座前稍西設發寶案稍東掌謁設香案於皇后殿前設冊案於殿內座榻前稍西寶案稍東設受冊案於座榻上

稍西設受寶案於稍東侍儀司設版位冊使副位於
廷中北面冊官位於右寶官位於左禮儀使位於冊
案前主節位於太尉左皇后殿廷亦如之至期大昕
引贊叙太尉以下於闕廷各公服侍儀使禮儀使引
冊使引冊奉冊舉冊讀冊捧冊官由月華門入侍
儀使禮儀使引冊副引寶奉寶舉寶讀寶捧寶官由
日精門入至露階下依板位立侍儀使捧牙牌入至
寢殿前跪報外辦內侍入奏出傳制曰可侍儀使俯

伏興皇帝出閣升輦鳴鞭三侍儀使引導從導皇帝
入大明殿陞御座鳴鞭三司晨報時鷄唱畢尚引引
殿前班入起居位起居贊拜舞蹈三呼如儀宣贊唱
曰各恭事引贊引冊使以下入就位掌儀舍人引承
奉班都知侍儀使禮儀使主節捧冊捧寶官升自左
階由南東門入至御座前分左右相向立掌儀贊曰
禮儀使稍前跪曰太尉以下皆跪禮儀使跪奏請進
發皇后冊寶掌儀贊曰就拜曰興曰平身曰太尉以

下皆興曰復位掌儀贊曰內謁者稍前曰搢笏曰捧冊寶跪進皇帝曰以冊寶授捧冊寶官捧冊寶官跪受興掌儀贊曰主節官搢笏持節禮儀使引節導冊寶由正門出至露階南向立禮儀使稱有制承奉班都知唱曰太尉以下皆再拜通贊曰鞠躬曰拜曰興曰拜曰興曰平身禮儀使宣制曰命太尉某等持節授皇后冊寶通贊贊曰鞠躬曰拜曰興曰拜曰興曰平身降至露階下依次就位掌儀唱曰以冊寶置於案曰出笏

曰復位方輿舁以行樂作侍儀使禮儀使引太尉及冊寶官奉隨至皇子宫庭奠案樂止掌儀唱曰捧冊寶官稍前搢笏捧冊寶使太尉以下奉隨由正階躋至案前掌儀贊曰以冊寶置於案曰出笏曰復位侍儀使稍前跪報外辦內侍入啟出傳制曰可侍儀使俯伏興皇后出閣詣褥位太尉稱制遣臣某等恭授皇后冊寶內侍贊禮曰跪掌儀贊曰太尉以下皆跪內侍贊皇后曰上香曰上香曰三上香曰拜曰興曰

拜曰興掌儀贊曰太尉以下皆興皇后陞殿立於座
榻前承奉班都知唱曰太尉以下進冊寶掌儀唱曰
捧冊寶官稍前搢笏捧冊寶由正門至殿內掌儀贊
曰以冊寶跪置於案曰捧冊寶官出笏興復位曰太
尉以下皆跪曰舉冊官興至案前跪曰搢笏取冊於
匣置於盤對舉曰讀冊官興至案前跪曰讀冊讀冊
官稱臣某謹讀冊讀畢納冊於匣掌儀贊曰出笏舉
寶官興至案前跪搢笏取寶於盞對舉曰讀寶官興

至案前跪曰讀寶讀寶官稱臣某謹讀寶讀畢納寶於盥掌儀贊曰出笏曰太尉以下皆就拜曰興曰平身捧冊寶官以冊寶授太尉太尉以授掌謁掌謁以冊寶置於受冊寶案掌儀唱曰太尉以下跪曰衆官皆跪太尉致祝辭曰冊寶禮畢伏願皇后與天同算司徒應曰如所祝就拜興平身太尉進酒樂作皇后飲畢樂止禮儀使引節引主節由正門以出侍儀使引太尉以下由左門至階下北面立承奉班都知唱

曰太尉以下皆再拜通贊曰鞠躬曰拜曰興曰拜曰
興曰平身侍儀使引太尉以下還詣皇帝御座前跪
奏曰奉制授皇后冊寶謹以禮畢就拜興由左門以
出降詣旁折位侍儀使引導從導皇后詣大明殿前
謝恩掌謁贊曰拜曰興曰拜曰興侍儀使分退掌謁
導皇后升御座典引引丞相以下入起居位起居贊
拜如儀侍儀使詣右丞相前請進酒雙引升殿至宇
下褥位立侍儀使分左右北向立俟前行色曲將半

舞旋列定通贊唱曰分班樂作侍儀使引右丞相由南東門入宣徽使奉隨至御榻前右丞相跪宣徽使立於東南曲終右丞相祝贊曰冊寶禮畢臣等不勝慶忻同上皇帝皇后萬萬歲壽宣徽使應曰如所祝右丞相俯伏興退詣進酒位進酒進表章禮物贊拜僧道賀獻大宴殿正並如元宴畢鳴鞭三侍儀使導駕引進使導后還寢殿正儀如來儀

冊皇太子儀

前期三日右丞相率百僚至金玉局冊寶案前舍人
贊曰鞠躬曰拜曰興曰拜曰興曰平身曰班首稍前
曰跪曰在位官皆跪曰搢笏曰上香曰上香曰三上
香曰出笏曰就拜曰興曰拜曰興曰拜曰興曰平身
侍儀使舍人分引羣臣儀衛音樂導至中書省正位
安置前期二日儀鸞司設發冊案於大明殿御座西
發寶案於東典寶官設香案於太子殿前階上設冊案
於西寶案於東又設受冊案於殿內座榻之西受寶

案於東侍儀司設板位太尉冊使副位於大明殿廷
太尉位居中冊官位於右寶官位於左禮儀使位於
前主節官位於太尉之左太子殿廷亦如之樂位布
置亦如之右丞相率百僚朝服至中書省冊寶案前
叙立定舍人贊曰鞠躬曰拜曰興曰拜曰興曰平身
曰班首稍前曰跪曰搢笏曰在位官皆跪曰上香曰
上香曰三上香曰出笏曰就拜曰興曰拜曰興曰拜
曰興曰平身舍人分引羣臣儀衛導從音樂傘扇導

至闕前控鶴奠案方輿官舁之由中道入崇天門冊使以下奉隨至露階下方輿官置冊案於西寶案於東分退立於兩廡冊使副北面引冊官舉冊官讀冊官捧冊官位於冊案西東向引寶官舉寶官讀寶官捧寶官位於寶案東西向掌儀舍人贊曰捧冊官稍前曰搢笏曰捧冊又贊曰捧寶官稍前曰搢笏曰捧寶侍儀使引進使引冊官引寶官前道守捧冊寶官次之冊使副以下奉隨升大明殿午階由正門入至進

發冊寶案前冊使副北向立引冊官引寶官舉冊官
舉寶官以下分左右夾冊寶案立掌儀贊曰以冊寶
置於案曰出笏曰復位侍儀使引奉冊使以下由左
門出百辟趨退至期大昕引贊引冊使以下皆公服
叙位於闕廷侍儀使導從皇帝出閣鳴鞭三陞大明
殿登御座尚引引殿前班入起居位起居贊拜如儀
宣贊唱曰各恭事引贊引冊使以下入就位掌儀舍
人引承奉班都知侍儀使禮儀使主節郎捧冊捧寶

官升自左階由左門入至御座前分左右立掌儀贊
曰禮儀使稍前曰跪曰衆官皆跪禮儀使奏請發皇
太子冊寶掌儀唱曰就拜曰興曰平身曰衆官皆興
曰復位曰內謁者稍前曰搢笏曰捧冊寶跪進皇帝
曰以冊寶授捧冊寶官捧冊寶官跪受興掌儀贊曰
主節郎搢笏持節禮儀使引節導冊寶由正門以出
至露階南向立禮儀使稱有制承奉班都知唱曰太
尉以下皆再拜掌儀贊曰鞠躬曰拜曰興曰拜曰興

曰平身禮儀使宣制曰上命太尉等持節授皇太子
 冊寶掌儀贊曰鞠躬曰拜曰興曰拜曰興曰平身禮
 儀使引節尊冊寶降至露階下依次就位掌儀贊曰
 以冊寶置於案曰出笏曰復位方輿舁以行樂作侍
 儀使禮儀使主節前導冊使以下奉隨由正門出至
 闕前方輿奠案控鶴舁以行至皇太子殿廷控鶴奠
 案方輿舁以行入至露階下奠案方輿退樂止冊使
 以下以次立掌儀贊曰捧冊寶官稍前搢笏捧冊寶侍

儀使引節主節尊冊寶以行冊使以下由正階躋節
立於香案之西掌儀贊曰捧冊寶官跪以冊寶置於
案曰出笏曰興曰就位右庶子跪報外備內侍入啟
出傳旨曰可右庶子俛伏興皇太子出閣立於香案
前掌儀贊曰皇太子跪曰上香曰上香曰三上香曰
拜曰興曰拜曰興太尉前稱制遣臣某等恭授皇太
子冊寶復位掌儀贊曰皇太子拜曰興曰拜曰興請
皇太子詣褥位南向立曰皇太子跪曰諸執事官皆

跪曰舉冊官興至案前曰跪曰讀冊讀畢曰納冊於
匣曰出笏掌儀唱曰舉寶官興至案前曰跪曰讀寶
讀畢曰納寶於盞曰出笏曰舉冊寶官讀冊寶官皆
興復位掌儀贊曰太尉進授冊寶侍儀使引太尉司
徒至冊寶案前搢笏以冊寶跪進皇太子恭受以授
左右庶子左右庶子搢笏跪受掌儀贊曰皇太子興
冊使以下皆興右庶子捧冊左庶子捧寶導皇太子
入殿右庶子奠冊於受冊案左庶子奠寶於受寶案

引節引主節立於殿西北引贊引太尉以下降階復位北向立承奉班都知唱曰太尉以下皆再拜掌儀贊曰鞠躬曰拜曰興曰拜曰興曰平身樂作侍儀使詣太尉前請進酒太尉入至殿內進酒畢降復位樂止侍儀使禮儀使主節導太尉以下還詣大明殿御座前跪奏曰奉制授皇太子冊寶謹以禮畢俯伏興降詣位侍儀使左右庶子導皇太子詣大明殿御座前謝恩右庶子贊曰拜曰興曰拜曰興進酒又贊曰

拜曰興曰拜曰興降殿還府侍儀使詣右丞相前請
進酒雙引升殿至宇下褥位立侍儀使分左右北向
立俟前行色曲將半舞旋列定通贊唱曰分班樂作
侍儀使右丞相由南東門入宣徽使奉隨至御榻前
右丞相跪宣徽使立於東南曲終右丞相祝贊曰皇
太子冊寶禮畢臣等不勝慶忻同上皇帝皇后萬萬
歲壽宣徽使應曰如所祝右丞相俯伏興退詣進酒
位進酒進表章禮物贊拜如元正儀駕興鳴鞭三侍

儀使導駕還寢殿如來儀皇太子還府陞殿典引引
羣臣入就起居位通班自班西行至中道唱曰具官
某以下起居典引贊曰鞠躬曰平身進就拜位宣贊
唱曰拜通贊贊曰鞠躬曰拜曰興曰拜曰興曰平身
侍儀使詣班首前請進酒雙引由左階下至殿宇下
褥位立侍儀分左右北向立俟前行色曲將半舞旋
列定通贊唱曰分班班首入左門右庶子隨至座前
班首跪右庶子立於東南俟曲終班首致祝詞曰冊

寶禮畢願上殿下千秋之壽右庶子應曰如所祝班
首俯伏興退至進酒位搢笏捧觴北向立右庶子退
復位俟舞旋至露階樂舞至第四拍班首進酒宣贊
唱曰文武百僚皆再拜通贊贊曰鞠躬曰拜曰興曰
拜曰興曰平身班首自東門出復位樂止通贊唱曰
合班中書押進箋及禮物案至橫階下進讀箋官由
左階躋進讀禮物官至階下俟進讀箋官至宇下先
讀箋目次讀箋讀畢俯伏興降至階下進讀禮物官

升階至宇下跪讀禮物狀畢俯伏興退同讀箋官至
橫階隨箋案西行至右廡下禮物案東行至左廡下
各付所司宣贊唱曰拜通贊贊曰鞠躬曰拜曰興曰
拜曰興曰平身右庶子導皇太子還閣

明冊皇后儀

太祖初定制凡冊皇后前期三日齋戒遣官告祭天
地宗廟前一日侍儀司設冊寶案於奉天殿御座前
設奉節官位於冊案之東掌節者位於其左稍退設

承制官位於其南俱西向設正副使受制位於橫街之南北向設承制宣制官位於其北設奉節奉冊奉寶官位於其東北俱西向設正副使受冊寶褥位於受制位之北北向典儀二人位丹陛上南贊禮二人位正副使北知班二人位贊禮之南俱東西相向百官及侍從位如朝儀是日早列鹵簿陳甲士設樂如儀內官設皇后受冊位及冊節寶案于宮中設香案於殿上設權置冊寶案於香案前設女樂於丹陛質

明正副使及百官入鼓三嚴皇帝袞冕御奉天殿禮部官奉冊寶各置於案諸執事官各入就殿上位立樂作四拜興樂止承制官奏發皇后冊寶承制訖由中門出降自中陞至宣制位曰有制正副使跪承制官宣制曰冊妃某氏為皇后命卿等持節展禮宣畢由殿西門入正副使俯伏興執事者舉寶冊案由中門出降自中陞奉節官率掌節者前導守至正副使褥位以案置於北掌節者脫節衣以節授奉節官奉節

官以授正使正使以授掌節者掌節者跪受興立於
正使之左奉節官退引禮引正使詣受冊位奉冊官
以冊授正使正使跪受置於案退復位副使受寶亦
如之樂作正副使四拜興樂止正使隨冊副使隨寶
掌節者前導舉案者次之樂作出奉天門樂止侍儀
奏禮畢駕興百官出掌節者加節衣奉冊寶官皆搢
笏取冊寶置龍亭內儀仗大樂前導至中宮門外樂
作皇后具九龍四鳳冠服褱衣出閣至殿上南向立

樂止正副使奉冊寶權置於門外所設案上引禮引
正副使及內使監令俱就位正使詣內使監令前稱
冊禮使臣某副使臣某奉制授皇后冊寶內使監令
入告皇后出復位引禮引內外命婦入就位正使奉
冊授內使監令內使監令跪受以授內官副使授寶
亦如之各復位內使監令率奉冊奉寶內官入各置
於案尚儀引皇后降陛詣庭中位立內官奉冊寶立
於皇后之東西內使監令稱有制尚儀奏拜皇后拜

樂作四拜興樂止宣制訖奉冊內官以冊授讀冊內官讀訖以授內使監令內使監令跪以授皇后皇后跪受以授司言奉寶如前儀受訖以授司寶尚儀奏拜皇后拜如前內使監令出詣正副使前稱皇后受冊禮畢使者退詣奉天殿橫街南北面西上立給事中
中立於正副使東北西向正副使再拜復命曰奉制冊命皇后禮畢又再拜給事中奏聞乃退皇后既受冊寶升座引禮引內命婦班首一人詣殿中賀位跪

致詞曰茲遇皇后殿下膺受冊寶正位中宮妾等不
勝懽慶謹奉賀贊拜樂作再拜興樂止退復位又引
外命婦班首一人入就殿上賀位如內命婦儀禮畢
俱出皇后降座樂作還閣樂止次日百官上表箋稱
賀皇帝御殿受賀如常儀遂卜日行謁廟禮先遣官
用牲牢行事告以皇后將祇見之意前期皇后齋三
日內外命婦及執事內官齋一日設皇后拜位於廟
門外及廟中設內命婦陪祀位於廟庭南外命婦陪

祀位於內命婦之南司贊位皇后拜位之東司賓位
內命婦之北司香位香案右陳盥洗於階東司盥洗
官位其所至日內外命婦各翟衣集中宮內門外皇
后具九龍四鳳冠服褙衣出內宮門升輿至外門外
降輿升重翟車鼓吹設而不作尚儀陳儀衛次外命
婦次內命婦皆乘車前導內使監扈從宿衛陳兵仗
前後導從皇后至廟門司賓引命婦先入皇后降車
司贊導自左門入就位北向立命婦各就位北向立

司贊奏拜司賓贊拜皇后及命婦皆再拜興司贊請詣盥洗位盥手悅手由東陞升至神位前司贊奏上香者三司香捧香於右皇后三上訖導復位贊拜如前司贊奏禮畢皇后出自廟之左門命婦以次出皇后升車命婦前導如來儀過廟鼓吹振作皇后入宮是日皇帝宴羣臣於謹身殿皇后宴內外命婦於中宮皆如正旦宴會儀及成祖即位冊皇后徐氏其制小異皇帝皮弁服御華蓋殿翰林院官以詔書用寶

訖然後御奉天殿傳制皇后受冊禮畢翰林院以詔書授禮部官禮部官奉詔書於承天門開讀皇帝還宮率皇后具服詣奉先殿謁告畢皇后具服於內殿俟皇帝升座贊引女官導詣拜位行謝恩禮樂作八拜興樂止禮畢次日皇帝皇后受賀宴會如前儀天順八年增定親王於皇帝前慶賀次詣皇太后慶賀次詣皇后前八拜儀嘉靖十三年冊皇后方氏禮臣具儀注有謁告內殿儀無謁告太廟世廟之禮帝命

議增于是禮臣以儀上先期齋三日所司陳設如時
袷儀至日皇帝御輅皇后妃御翟車同詣太廟命官
奉七廟主升神座訖皇帝奉高皇帝主皇后奉高皇
后主出升神座迎神上香奠帛裸獻樂作止皆如儀
次詣世廟行禮同上儀穆宗隆慶元年增定頒詔次
日命婦行見皇后禮

天子納后儀

正統七年英宗大婚始定儀注凡納采問名前期擇

日遣官告天地宗廟至期設御座制案節案鹵簿綵
輿中和大樂如儀禮部陳禮物於丹陛上及文樓下
質明皇帝冕服陞座百官朝服行禮訖各就位正副使
朝服四拜執事舉制案節案由中門出禮物隨之俱
置丹陛中道傳制官宣制曰茲選某官某女為皇后
命卿等持節行納采問名禮正副使四拜駕輿舉制
節案由奉天門中門出正副使取節及制書置綵輿
中儀仗大樂前導出大明門釋朝服乘馬行詣皇后

第第中設使者幕次於大門外左南向設香案於正堂設制節案於南別設案於北使者至引禮導入幕次執事官陳禮物於正堂使者出次奉制書於案禮官先入立於東主婚朝服出立於西禮官曰奉制建后遣使行納采問名禮引主婚者出迎使者捧制書及節主婚者隨至堂置制書及節於案正副使分立案左右主婚者四拜詣案前跪正使取納采制宣曰朕承天序欽紹鴻圖經國之道正家為本夫婦之倫

乾坤之義實以相宗祀之敬協奉養之誠所資惟重
祇遵聖母皇太后命遣使持節以禮采擇宣訖授主
婚者主婚者授執事者置於北案上稍左副使取問
名制宣曰朕惟夫婦之道大倫之本正位乎內必資
名家特遣使持節以禮問名尚佇來聞宣訖授如前
置案上稍右主婚者俛伏興執事舉表案以表授主
婚者主婚者跪授正使表曰臣某伏承嘉命正使某
官某等重宣制詔問臣名族臣女臣夫婦所生先臣

某官某之曾孫先臣某官某之孫先臣某官某之外
孫臣女今年若干謹具奏聞主婚者俛伏興退四拜
使者出置表綵輿中主婚者前曰請禮從者酒饌畢
主婚者捧幣以勞使者使者出主婚者送至大門外
使者隨綵輿入大明門左門至奉天門外以表節授
司禮監復命次納吉納徵告期傳制遣使並如前儀
但納徵用元纁束帛六馬穀圭等物制詞曰茲聘某
官某女為皇后命卿等持節行納吉納徵告期禮皇

后第陳設如前惟更設玉帛案使者至以制書玉帛
置案上六馬陳堂下執事先設皇后冠服諸物於正
堂禮官入主婚者出迎執事舉玉帛案正使捧納吉
納徵制書副使捧告期制書執節者捧節以次入各
置於案主婚者四拜詣案前跪正使取制書宣曰大
婚之卜龜筮師士協從敬循禮典遣使持節告吉又
宣曰卿女有貞靜之德稱母儀之選宜共承天地宗
廟持遣使持節以禮納徵宣訖授主婚者正副使又

捧圭及元纁以授主婚者俱如前儀副使取制書宣
曰歲令月良吉日某甲子大婚維宜特遣使持節以
禮告期宣訖授如前儀主婚者四拜使者持節出主
婚者禮使者使者還復命如初次發冊奉迎所司陳
設如前儀禮部陳雁及禮物於丹陛上內官監陳皇
后鹵簿車輅於奉天門外制詞曰茲冊某官某女為
皇后命卿等持節奉冊寶行奉迎禮正副使以冊寶
置綵輿中隨詣皇后第至門取制書冊寶置案上禮

官先入主婚者朝服出見禮官曰奉制冊后遣使持節奉冊寶行奉迎禮主婚者出迎執事者舉案前行使者奉制書及節執事者以雁及禮物從之至堂中各置於案使者左右立主婚者四拜退立於西南女官以九龍四鳳冠褱衣進皇后內官陳儀伏於中堂前設女樂於堂下作止如常儀使者以節冊寶授司禮監官內贊導入中堂皇后具服出閣詣香案前向闕立四拜贊宣冊皇后跪宣冊官宣訖以授皇后皇

后搢圭受冊以授女官女官跪受立於西贊宣寶如
宣冊儀贊出圭贊興四拜訖皇后入閣司禮監官持
節出授使者報受冊寶禮畢主婚者詣案前跪正使
取奉迎制宣訖授主婚者副使進雁及禮物主婚者
皆跪受如前儀主婚者興使者四拜出主婚者禮使
者如初女官奏請皇后出閣自東階下立香案前四
拜陞堂南向立主婚者進立於東西向日戒之敬之
夙夜無違退立於東階母進立於西東向施衿結帨

曰勉之敬之夙夜無違退立於西階內執事請乘輿
皇后降階升輿導從出儀仗大樂前行次綵輿正副
使隨次司禮監官擁導從大明門中門入百官朝服
於承天門外班迎候輿入乃退皇后至午門外鳴鐘
鼓鹵簿止正副使以節授司禮監復命授冊寶官捧
冊寶儀仗女樂前導進奉天門至內庭幕次司禮監
以冊寶授女官皇后出輿由西階進皇帝由東階降
迎於庭揖皇后入內殿帝詣更衣處具袞冕后詣更

服處更禮服同詣奉先殿行謁廟禮祭畢還宮合鬯
帝更皮弁陞內殿后更衣從陞各陞座東西相向執
事者舉饌案於前女官取四金爵酌酒以進既飲進
饌復進酒進飯訖女官以兩盃酌酒合和以進既飲
又進饌畢興易常服帝從者餽后之饌后從者餽帝
之饌次日早帝后皆禮服候太后陞座帝后進座前
宮人以服脩盤立於后左帝后皆四拜執事舉案至
宮人以服脩盤授后后捧置於案女官舉案后隨至

太后前進訖復位帝后皆四拜三日早帝冕服后禮服同詣太后宮行八拜禮還宮帝服皮弁陞座女官導后禮服詣帝前行八拜禮后還宮陞座引禮導在內親屬及六尚等女官行八拜禮次各監局內官內使行八拜禮是日皇帝御奉天殿頒詔如常儀四日早皇帝服袞冕御華蓋殿親王八拜次執事官五拜遂陞奉天殿百官進表行慶賀禮是日太后及皇后各禮服陞座親王八拜出次內外命婦慶賀及外

命婦進表箋皆如常儀五日行盥饋禮尚膳監具膳脩皇后禮服詣太后前四拜尚食以膳授皇后皇后捧膳進於案復位四拜退立於西南俟膳畢引出

冊妃嬪儀

洪武三年冊孫氏為貴妃定制皇帝不御殿承制官宣制曰妃某氏特封某妃命卿等持節行禮但授冊無寶餘並如中宮儀永樂七年定冊妃禮皇帝皮弁服御華蓋殿傳制至宣宗立孫貴妃始授寶憲宗封

萬貴妃始稱皇非洪武之舊矣嘉靖十一年帝冊九
嬪禮官上儀注先日所司陳設儀仗如朔望儀至期
皇帝具袞冕告太廟世廟訖易皮弁服御華蓋殿百
官公服入行禮正副使朝服承制舉節冊至九嬪宮
九嬪迎於宮門外隨至拜位女官宣冊九嬪受冊先
後八拜送節出宮門復命九嬪隨具服候皇后率詣
奉先殿謁告及詣皇帝皇后前謝恩俱如冊妃禮惟
圭用次玉穀文銀冊少殺於皇妃五分之一二十年

冊德妃張氏以妃將就室而帝方靜攝不傳制不謁
告內殿餘並如舊

冊皇太子及皇太子妃儀

明興定制冊皇太子所司陳設如冊后儀設皇太子
拜位於丹陛上中嚴皇帝衮冕御謹身殿皇太子冕
服俟於奉天門外辦皇帝御奉天殿引禮導皇太子
入奉天東門樂作由東階升至丹陛位樂止百官各
就丹陛位樂作皇太子再拜興樂止承制官由殿中

門出立於門外曰有制皇太子跪宣制曰冊長子某
為皇太子皇太子俯伏興樂作再拜樂止引禮導皇
太子由殿東門入樂作內贊導至御座前樂止內贊
贊跪贊宣冊宣畢贊搢圭贊授冊皇太子搢圭跪受
冊以授內侍復贊授寶如授冊儀贊出圭皇太子出
圭俯伏興由殿東門出執事官舉節冊寶隨出皇太
子復位樂作四拜興樂止由東階降樂作至奉天門
樂止儀仗鼓樂迎冊寶至文華殿持節官持節復命

禮部官奉詔書赴午門開讀百官迎詔至中書省頒
行侍儀奏禮畢駕輿還宮皇太子詣內殿候皇后升
座行朝謝禮四拜恭謝曰小子某茲受冊命謹詣母
后殿下恭謝復四拜禮畢親王世子郡王俟於文華
殿丹陛上皇太子升座親王以下由東陛升就拜位
四拜長王恭賀曰小弟某茲遇長兄皇太子榮膺冊
寶不勝忻忭之至謹率諸弟詣殿下稱賀賀畢皆四
拜皇太子興以次出諸王詣中宮四拜長王致詞賀

畢皆四拜出是日皇太子詣武英殿見諸叔行家人禮四拜諸叔西向坐受見諸兄行家人禮二拜諸兄西向立受次日百官進表箋慶賀內外命婦慶賀中宮如常儀乃擇日太子謁太廟洪武二十八年皇太子親王俱授金冊不用寶永樂二年定先三日齋戒遣官祭告天地宗廟受冊寶畢先詣太廟謁告後至奉天殿謝恩乃入謝中宮二十二年十月冊東宮以梓宮在殯樂設而不作奉先殿行禮畢仍詣几筵謁

告宣德二年十一月皇子生羣臣表請立太子三年
二月行禮以太子尚幼乃命正副使授冊寶於文華
門成化十一年以冊立皇太子禮成文武官分五等
賜綵緞有差嘉靖十八年二月冊東宮帝詣南郊告
上帝詣太廟告皇祖自北郊及列聖宗廟以下皆遣
官時太子方二歲保姆奉之迎冊寶於文華殿門詣
皇帝前謝恩皇后貴妃代太子八拜詣皇后前貴妃
代八拜詣貴妃前保姆代四拜餘如常儀其皇太子

妃受冊與皇太子同日傳制節冊將至內殿妃降自東階迎置於案贊就拜位贊跪妃跪贊宣冊女官跪取冊立宣畢贊授冊贊搢圭女官以冊授妃妃搢圭受冊訖以授女官女官跪受捧立贊出圭興四拜禮畢內官持節出妃送至殿外正副使持節復命是日妃具禮服詣奉先殿行謁告禮隨詣宮門俟皇帝皇后升座入謝恩行八拜禮又詣各宮皇妃前行四拜禮還宮詣皇太子前亦四拜禮畢升座王妃公主郡

主及外命婦於丹墀拜賀如儀

冊親王及王妃儀

洪武三年定制冊命親王先期告宗廟所司陳設如冊東宮儀至期皇帝御奉天殿皇太子親王由奉天東門入樂作陞自東陞皇太子由殿東門入內贊導至御前侍立位親王入至丹陛拜位樂止贊拜樂作再拜興樂止承制官承制如儀諸王皆跪宣制曰封皇子某為某王某為某王宣畢諸王俯伏興贊拜樂

作再拜興樂止引禮導王由殿東門入樂作內贊引
至御座前拜位樂止王跪贊授冊捧冊官以冊授讀
冊官讀訖以授丞相丞相授王王搢圭受以授內使
授寶如上儀訖王出圭俯伏興引禮導王出復位以
次引諸王入殿授冊寶如儀內使以冊寶置綵亭訖
贊拜樂作諸王皆四拜興樂止內使舉亭前行親王
由東階降樂作出奉天東門樂止禮部尚書請詔書
用寶赴午門開讀禮畢皇帝還宮皇太子出王年幼

則遣官齋冊寶授之丞相承制至王所東北立西南
向宣制最幼者行保抱之禮是日親王朝謝皇后太
子與東宮受冊朝謝同親王各自行賀幼者詣長者
行四拜禮百官詣親王賀亦行四拜禮丞相至殿上
跪文武官於庭中丞相致詞曰某官某等茲遇親王
殿下榮膺冊寶封建禮成無任忻忭之至賀畢丞相
及百官復四拜次日皇太子冕服於奉天殿朝賀皇
帝太子致詞曰長子某茲遇諸弟某受封建國謹詣

父皇陛下稱賀賀中宮致詞曰謹詣母后殿下稱賀
百官進表箋賀皇帝及中宮東宮如東宮受冊儀內
外命婦賀中宮致詞曰妾某氏等茲遇親王受封建
國恭詣皇后殿下稱賀是日百官及命婦各賜宴擇
日諸王謁太廟時秦晉燕楚吳五王皆長而齊潭趙
魯四王方幼故兼具其制靖江王則以親王封故視
秦晉儀二十八年定制親王嫡長子年十歲授金冊
寶立為王世子次嫡及庶子皆封郡王凡王世子必以

嫡長王年三十正妃未有嫡子其子止為郡王待王
與正妃年五十無嫡子始立庶長子為王世子襲封
朝廷遣人行冊命之禮成化末封興岐益衡雍五王
帝親告奉先殿遣使就各王府冊之罷臨軒禮而諸
王當襲封者俱於歲終遣官冊封嘉靖中改於孟春
著為令冊王妃與冊太子妃儀同

冊公主儀

洪武九年七月命使冊公主設冊案於乾清宮御座

之東南冊用銀字鍍金皇帝皇后升御座遣使捧冊
傳制如儀使者至華蓋殿公主拜受其儀畧與冊太
子妃同凡皇姑曰大長公主皇姊妹曰長公主皇女
曰公主親王女曰郡主郡王女曰縣主孫女曰郡君
曾孫女曰縣君元孫女曰鄉君郡主以下受誥封不
冊命

皇太子親王婚 公主下嫁

宋理宗景定二年昇國公主下降

初公主年及笄詔議選尚宰臣請用唐太宗下降士人故事欲以進士第一人尚主遂取周震炎廷謝曰公主適從屏內窺見意頗不懌帝微知之乃選楊太后姪孫鎮尚主進封周國公主

遼公主下嫁儀

選公主諸父一人為婚主凡當與者媒者致詞之儀自納幣至禮成大畧如納后儀擇吉日詰旦媒者趣尚主之家詣宮侯皇帝皇后御便殿率其族入見進

酒訖命皇族與尚主之族相偶飲翼日尚主之家以
公主及壻率其族入見致宴於皇帝皇后獻贐送者
禮物訖朝辭賜公主青幃車一送終車一以擬送終
之用二車之制詳見後后妃以下車輦函簿門至覆尸儀物咸在賜其壻
朝服四時襲衣鞍馬凡所須無不備選皇族一人送
至其家親王女封公主者婚儀倣此以親䟽為降
殺

明皇太子納妃儀

洪武元年定制凡行禮皆遣使持節如皇帝大婚儀
納采問名制曰奉制納某氏女為皇太子妃命卿等
行納采問名禮至妃第僎者出詣使者前曰敢請事
使者曰儲宮納配屬於令德邦有常典使某行納采
之禮僎者入告主婚者曰臣某之子昧於壺儀不足
以備采擇恭承制命臣某不敢辭僎者出告使者入
陳禮物於庭宣制曰某奉詔采擇奠雁禮畢使者出
僎者復詣使者前曰敢請事使者曰儲宮之配采擇

既諧將加卜筮奉制問名儻者入告主婚者曰制以臣某之女可以奉侍儲宮臣某不敢辭儻者出告使者復入陳禮奠雁如儀宣制曰某奉詔問名將謀諸卜筮主婚者曰臣某第幾女某氏出次納吉儻者請事如前使者曰謀諸卜筮其占協從制使某告吉儻者入告主婚者曰臣某之子蠢愚懼弗克堪卜筮云吉惟臣之幸臣謹奉典制儻者出告使者入陳禮奠雁如儀宣制曰奉制告吉又次納徵儻者出告使者

入陳玉帛禮物不奠雁宣制曰某奉制告成又次請
期詞曰詢於龜筮某月某日吉制使某告期主婚者
曰敢不承命陳禮奠雁如儀又次告廟遣使持節授
冊寶儀注悉見前又次醮戒皇帝服通天冠絳紗袍
御奉天殿百官侍立引進導皇太子至丹陛四拜入
殿東門就席位東向立司爵以醴進皇太子跪搢圭
受醴祭酒司饌以饌進跪受亦如之興就席坐飲食
訖導詣御座前跪皇帝命之曰往迎爾相承我宗事

勗帥以敬皇太子曰臣某謹奉制旨俛伏興出至丹
陛四拜畢皇帝還宮皇太子出又次親迎前一日有
司設皇太子次於妃氏大門外南向東宮官次於南
東西相向至日質明東宮官具朝服陳鹵簿鼓吹於
東宮門外皇太子冕服乘輿出侍衛導從如儀至宮
門降輿升輅東宮官皆從至妃第回轅南向降輅升
輿至次降輿入就次東宮官皆就次先是皇太子將
至主婚者設會宴女至期妃服褕翟花釵出就閣南

面立傅姆立於左右主婚者具朝服立於西階之下
引進導皇太子出次立於大門之東西向儻者朝服
出立於門東曰敢請事引進跪啟訖皇太子曰某奉
制親迎引進受命興承傳於儻者儻者入告導主婚
者出迎於大門外之西東向再拜皇太子答拜引進
導皇太子入門而左執雁者從儻者導主婚者入門
而右皇太子陞東階進立於閤門戶前北向立主婚
者升西階立於西東向引進啓奠雁執奠者以雁進

皇太子受雁以授主婚者主婚者跪受興以授左右
退立於西皇太子再拜降自東階出至次以俟主婚
者不降送初皇太子入門妃母出立於閤門外奠雁
位之西南向皇太子拜訖宮人傅姆導妃出立於母
左主婚者命之曰戒之戒之夙夜恪勤毋或違命母
命之曰勉之勉之爾父有訓往承惟欽庶母申之曰
恭聽父母之言宮人傅姆擎執導從妃乘輿出門降
輿乘鳳轎皇太子揭簾訖遂升輅侍從如來儀至東

宮門外降輅乘輿至閣降輿入俟於內殿門外之東
西面司閏導妃詣內殿門外之西東面皇太子揖妃
入行合卺禮如中宮儀又次朝見其日妃詣內殿陞
下候皇帝陞座司閏導妃入北面立再拜自西階升
宮人奉棗栗盤進至御座前授妃妃奠於御前退復
位再拜禮畢詣皇后前奉服修盤如上儀又次醴妃
次盥饋次謁廟次羣臣命婦朝賀皆如儀四年冊開
平王常遇春女為皇太子妃禮部上儀注太祖覽之

曰贄禮不用笄但用金盤翟車用鳳轎雁以玉為之
古禮有親迎執綏御輪今用轎則揭簾是矣其合巹
依古制用匏妃朝見入宮中乘小車以帷幕蔽之謁
廟則皇太子俱往禮成後三日乃宴羣臣命婦著為
令成化二十二年更定婚禮凡節冊等案俱由奉天
左門出皇太子親迎由東長安門出親迎日妃服燕
居服隨父母家廟行禮執事者具酒饌妃飲食訖父
母坐堂上妃詣前各四拜父命之曰爾往大內夙夜

勤慎孝敬無違母命之曰爾父有訓爾當敬承合鬯
前於皇太子內殿各設拜位皇太子揖妃入就位再
拜妃四拜然後各升座廟見後百官朝賀致詞曰某
官臣某等恭惟皇太子嘉禮既成益綿宗社隆長之
福臣某等不勝欣忭之至謹當慶賀帝賜宴如正旦
儀命婦詣太后皇后前賀亦賜宴致詞曰皇太子嘉
聘禮成益綿景福餘大率如洪武儀

親王婚禮

宣制曰冊某氏為某王妃納采致詞曰某王之儷屬
於懿淑使某行納采禮問名詞曰某既受命將加諸
卜筮奉制問名主婚者曰制以臣某之子可以奉侍
某王臣某不敢辭納吉詞曰卜筮協從使某告吉主
婚者曰臣某之子愚弗克堪卜貺之吉臣與有幸謹
奉典制納徵詞曰某王之儷卜既協吉制使某以儀
物告成主婚者曰奉制賜臣以重禮臣某謹奉典制
請期詞曰某月日涓吉制使某告期主婚者曰謹奉

命黜戒命曰往迎爾相用承厥家聃帥以敬其親迎
合盃朝見盥饋並如皇太子盥饋畢王皮弁服妃翟
衣詣東宮前行四拜禮東宮坐受東宮妃立受二拜
答二拜王與妃至妃家妃父出迎王先入妃父從之
至堂王立於東妃父母立於西王四拜妃父母立受
二拜答二拜王中坐其餘親屬見王四拜王皆坐受
妃入中堂妃父母坐妃四拜其餘序家人禮太祖之
世皇太子皇子有二妃洪武八年十一月徵衛國公

鄧愈女為秦王次妃不傳制不發冊不親迎正副使
行納徵禮冠服擬唐宋二品之制儀仗視正妃稍減
婚之日王皮弁服導妃謁奉先殿王在東稍前妃西
稍後禮畢入宮王與正妃正坐次妃詣王前四拜復
詣正妃前四拜次妃東坐宴飲成禮次日朝見拜位
如謁殿謁中宮不用棗栗服修餘並同

公主婚禮

凡公主出降行納采問名禮壻家備禮物表文於家

庭望闕再拜掌婚者奉至內東門詣內使前曰朝恩
貺室於某官某之子某習先人之禮使臣某請納采
以表跪授內使內使跪受奉進內殿執雁及禮物者
從入內使出掌婚者曰將加卜筮使臣某問名進表
如初內使出曰有制掌婚者跪內使宣曰皇帝第幾
女封某公主掌婚者俯伏興入就次賜宴出納吉儀
與納采同掌婚者致詞曰加諸卜筮占曰從吉謹使
臣某敢告納徵壻家具元纁玉帛乘馬表文如儀掌

婚者致詞曰朝恩貺室某官某之子某有先人之禮使臣某以束帛乘馬納徵請期詞曰某命臣某謹請吉日親迎日壻公服告廟曰國恩貺室於某以某日親迎敢告將行父醮於廳隨意致戒壻再拜出至內東門內使延入次執雁及奉禮物者各陳於庭其日公主禮服辭奉先殿詣帝后前四拜受爵帝后隨意訓戒受命訖又四拜降階內命婦送至內殿門外公主陞輦至內東門降輦壻揭簾公主陞轎壻出次

立執雁者以雁跪授壻壻受雁跪進於內使內使跪
受以授左右壻再拜先出乘馬還公主鹵簿車輅後
發公侯百官命婦送至府壻先候於門公主至壻揭
簾公主降同詣祠堂壻東公主西皆再拜進爵讀祝
又再拜出詣寢室壻公主相向再拜各就坐壻東公
主西進饌合盃如儀復相向再拜明日見舅姑舅姑
坐於東西向公主立於西東向行四拜禮舅姑答二
拜第十日駙馬朝見謝恩行五拜禮初洪武九年太

祖以太師李善長子祺為駙馬都尉尚臨安公主先期告奉先殿下嫁前二日命使冊公主冊後次日謁奉先殿又定駙馬受誥儀吏部官捧誥命置龍亭至太師府駙馬朝服拜受次日善長及駙馬謝恩後十日始請婚期二十六年稍更儀注然儀注雖存其拜舅姑及公主駙馬相向拜之禮終明之世寔未嘗行也弘治二年冊封仁和長公主重定婚儀入府公主駙馬同拜天地行八拜禮堂內設公主座於東西向

駙馬東向座餘如前儀嘉靖二年工科給事中安磐
等言駙馬見公主行四拜禮公主坐受二拜雖貴賤
本殊而夫婦分定于禮不安不聽愍帝崇禎元年
教習駙馬主事陳鍾盛言臣教習駙馬鞏永固駙馬
黎明于府門外月臺四拜云至三月後則上堂上門
上影壁行禮如前始視膳于公主前公主飲食于上
駙馬侍立于旁過此方議成婚駙馬餽菓簡書臣公
主答禮書賜皆大失禮夫既合卺則儼然夫婦安有

跪拜數月稱臣侍膳然後成婚者會典行四拜于
合卺之前明合卺後無拜禮也以天子館甥下同隸
役豈所以尊朝廷帝是其言令永固擇日成婚



欽定續文獻通考卷八十九